


土岐文庫
文庫17
W 82
14



文庫 17
W82
14

江湖長翁詩鈔

三十

陳造字唐卿淮之高郵人自以無補于世置江湖乃宜
又以物無用曰長物言無當曰長語故稱江湖長翁年
二十五始學儒四十三登乙未科尉繁昌改教授平江
府叅政范石湖曰使遇歐蘇名不在少游下尋知定海
縣授朝散郎淮南路安撫司叅議官病卒陸放翁序其
集謂能居今篤古卓然傑立于頽波之外其詩雅鍊不
事浮響故見許如此

寄二孫

憶昔初抱孫雙鬢颯已秋眼看與我長歲月如許適我以
薄宦西汝為守舍留夢輒來後前歲律歛再周想今與迺
父長我更牛頭天姿粹而溫整整靜不浮六經如取攜



昭和六十年二月一日贈
土岐善吉氏寄

010185188405

面自優游落筆動萬言頗能如翁不如翁何足道抗志須
前脩良匠有妙斲情農無厚收彼哉碌碌者不源而計流
吾言不虛往過是夫何求

右尿

阿秦幼儻礪勢若泛駕馬暫別已束髮折節殊曩者誦書
口瀾翻晝夜曾不捨課宥犯雪供筆亦揮汗把才地校優
劣不在阿儒下平時於方兄眇視真土苴念翁少年日爲
學不餘暇混俗類疎放秉心迺儒雅兒今頗肖吾解笑時
苟且師匠求有餘好書不外假緬懷螢雪邊力倍功更寡
可用吾季孟直輩古班賈

右辰

七月附米舟之浙中作

白蟲散如蛆黑蟲聚如蟻循緣仍啞齧欲寐復九起吾舟
玉爲粒生此果何理神奇作臭腐秋暑况如燬人生託洪

爐一飽蓋分爾臨流念彫年胡迺置身此笑口忽惜惋曼
膚或瘡痛隄防費應俗情僞良不美短籬護松菊吾歸殊
可喜錐刀詫朋儕嗟爾商販子

召伯停舟辟雨

去年是日之山陽辟雨繁梁作菩薩
蠻云

窗度荷芰風舟艤鴛鴦浦落帆憇篙師避此白淙雨長征
取愜快畱滯不云苦適喜縣麻勢爲盪鏢石暑去年舟繫
柳卧看虹飲渚龍公會事發尚記跳珠語崎嶇不諧俗似
爲龍所予一杯酬新涼開瓶先酌汝

過樊村

襄鄂二千里何啻三百灣風色九順逆左往復右還舟行
已三日沿流不作艱卽今蒼煙面猶是泊處山信次有定
期曲直了不關聊可供戲事輕橈與回環

贈錢郎中

利方利祿媒抱道俗不省詩書工發冢孰起世儒病錢侯
挺直節蠻徼復蘭省劍氣夜星明鵬翮秋霜耿上前論世
務萬乘為首宥平生中原慮壯歲左符請不作黃閣想擬
試白羽乘孤忠當寧知宏圖時宰領羣兒須圓曲謂可力
勝命彼此計乘除得甕喪崇鼎平生信所得一鑑照萬境
幕中辭脂韋客右進嚴冷主簿聲牙伯評俗怒生瘰謂伯
令君強項翁爭事不藏穎謂劉山陽但有周舍思可無衛武警
我亦意行者泥古志未逞朝來聽名理剪燭延落景寸田
殊易荒有賴剔榛梗效奇乏良策汲汲慙短綆惟期佩公
言不墮頽俗弊

八月晦試院中作

官居課程地生有文字癖誠知蠹負山詎得辭此檄嘉禾
古多士孰者非巨擘老眼不待封舊苦眩花隔勿云石賈
玉箴失眸亦得荀子云失箴者眸面得之捧心若為妍竊缺徒自匿陸
海貪窮搜奇寶多偶獲巧常昏金注勇或便大敵清醪聆
鄒琴欵識辨周南頗收半段槍還念連城壁渠應悔羔袖
吾敢厭雞肋撫囊率利穎體國免素食明朝羅客拜定自
百夫特俗無拋塼惡歸舟緩張席

三月初晚晴寄高縉之三首

東風掃積陰殘雨不敢漂壞雲裂裳帛倒掛墜嶺腰身影
不作暝夕陽明山椒安得上上頭風露永清宵
人家繡闥閉湖上粧面新湖山簫鼓中魚鳥安得馴山靈
建飛雨淨洗綺羅塵卽今隄邊柳為誰管殘春

曲欄倚青冥萬井入指顧湖光漾明霞照我凭欄處森木
倦鳥歸遙空征鴻度定知待月人破竹有奇句

車堰牛

牛力輕萬鈞性順異諸畜有足不解蹠有角不皆觸課日
引耒耜爲人給穀粟私家憂闕食公家要餘蓄公私雖相
須置汝誰取足奈何過堰客行舟動千斛挽牽亦諉汝蟲
蠹頸髀縮扣角一勞之不語對以腹物生愧無用懷安或
作福於人儻有益庶身豈云酷君看廟前牲被繡飽菽菽
膏血薦鼎俎誰定悲骸解

舟行卽事

昨日出曹娥明日指慈谿待潮舟爲膠得潮舟若蜚雷滯
復一快計程元不遲人生意失得孰者乘除之今屆昔已

伸彼羸此或虧但可自適過尚用悲喜爲水伯愚弄人政
如造物兒丈夫木作腸渠輩未易知

餞寄定海交代

縣尹古子男今不一錢直低催奉簡書偵伺常屏息白簡
與按章歲月供彈劾當路雖所懼姦民巧狙擊吻間售蜂
蠶意外變白黑防虞莫救過彌縫或逃謫政使有卓魯未
容置形迹云何世難事君不動聲色編民翁風移惡少且
心葦田廬有笑歌魍魅亦窳匿斯人紀仁愛幾磨南山石
政聲懿如此僅免繩治厄諸公蜚鸚書犯嚴尚遺力安得
定海民爲君灑薦墨蘭臺傳循吏採訪多失實安得定海
人爲君秉直筆嗟我吏隱者志在山南北身名萬金重如
博試此擲賴今遺愛地一一可矜式政恐效西子美顰得

嘲劇江皋一樽酒聊挽朝天客妙樂喧江浪清譚到理窟
盟言底遽寒舟駛潮水急西望念風義感歎徒至骨

送李象山趨朝

象山海邑古稱象山即今聽李明府
言頗亦費支語故云

書肘詎容掣筆柱不可膠付事多其防職業自寂寥頗思
圓機士細苛舉綱條宰邑古難之茹苦耐煎熬百抑不一
揚推波益驚濤由來法愈密祗爲下所操一饑驅我出銅
墨強折腰挾翅著籠中側睨鵬冲霄平生有知己持橐貳
銓曹若來定倒屣道我不自聊願推變通術霧雨均枯焦
而况代舍舊宥惜引手勞

十二月二十六日趨府

誰謂一舍遠不辦三食趨亭午縣市西衙鼓府城隅匹馬
驚鳥去指槌冰在須北風挾霜氣萬象付摧枯想當折琴
絃未怪裂人膚馳裘被甲如是日有若無客首不暇回顧
客少踟躕出處不能同勞逸爲之殊龐翁馬少游似非隱
者徒鄉居老躬耕飽溫得自虞婆娑銅墨間盍亦省顛顛
藜糲脫中熟吾口良易餬

別俞若任通判

一代石湖翁韓歐或其儼當時出門下如君屈幾指論定
難爲才我乃輩多士椎成方未噐正賴君礪砥師友繫魂
夢栩栩輒千里驚見得此客乾鵲預爲喜一笑破千憂天
幸寧有此石湖倏眼中此翁真不死

邵伯阻風小泊贈送行諸公

長征每愛日小泊未還意陰風自南北客子聽軒輕召棠
望吾鄉不作秦越異船閣鴈鷺洲人穿魚鰕市相逢各吳

語知識十三四水實不自買海錯有佳饋餞行餘十客超
俗見友義笑譚寒谷春為我洗羈思相與卧玉瓶跋燭得
微醉老懷易作惡別語毋動喙

魏帝廟

佛狸歲未卯志欲吞宇縣當年江飲馬腥血浸淮甸無人
飯耕牛有井巢歸燕至今闕遺史為汝空飲恨緬想瓜步
畱殺氣纏吳分云何此山椒遺像儼高殿無乃甘事讐吳
俗昧所見或復綿歷久後嗣忘敵怨冥莫彼有識福汝吾
敢信君看趙與薛徇國冒禍憂魏侯繼前躅長呼死白刃
胡不尸祝之香火均遠近豈但祈神休抑使頑懦奮誰今
決從違引手適我願

趙侯立薛侯慶魏侯勝皆淮南死事將也

長蘆寺

昔年望長蘆去江逾百步垣宇呀已缺浮圖欹欲仆僧徒
噉宥留自有沉溺懼重來舒望眼佛剎非故處安衆得亢
爽定遷疇夙素似聞瓶錫侶復作醯醢聚居人禱蠶麥行
客乞泉布營者肆夸侈施者不顧慮百堵煥金碧奚翅復
其故往往豪雋人四壁有未具彼徒剗寺意取鎮湍濤怒
向來梵唄所倏為蛟螭據在已不自保誘俗說依怙波流
置不省此理吾未論

泊慈湖此岸

坐覺江流平漉漫裂三股舟子告風橫因循宿中浦慈湖
古成近猶復小江阻漁翁家葦間蝸舍無鄰伍把酒訊三
老此寧泊舟所論我今昔異解帶無所苦向來揀丸徒白
畫猶旁午一白尚書來此葦凜刃鉏江山亘千里有屋皆

外戶似聞襄江道衽席過行旅翳公舊威愛平寧尚如許
兩地好經行為官喜欲舞倒牀鼻雷吼夢破聞船鼓受欺
墮姑息迂儒彼何取

謂張尚書定叟

上下驛磯

湖陰數里開山麓屹兩磯幾麓突江出禹功不及施千古
妨行舟死生擊毫釐我昔步磯上雨歇暑氣微驚湍下百
尺怒勢轟千聲尚憂坤軸動無怪沙岸欹螿龍渠得安過
鳥翅欲垂頭眩膽為掉坐歎舟上兒壯哉天下險茲軌容
抵熾如身護風寒要地此幾希今來歲華暮去舟良坦夷
人言水進退寒暑分盛衰古來設險守亦有可易時雨谷
與劔閣秦漢嘗用之人輕地亡重正煩折筮筮恃險無興
國興國須藩籬帝王所取重文武各攸司險易倏變改卽

磯餘可推

蕪湖感舊

下帆同鳥棲掛帆逐鷄起但見蕪湖月耿夜清如水江左
此壯縣我昔舟屢艤諸公各敬客款曲豈今比酒杯慣邀
畱妓鬪供燕喜流連動十日

每過蕪湖朱丁諸公約以十日為期

揮掃或千

紙舊游想如昨故交今餘幾逝者泉壤隔存者參辰似浪

憑楚些招盍寄相思字可能喚巫陽且欲託雙鯉

如未過繁昌

江山互映帶竹樹渺隱見居人江山間安處忘古縣泊舟
穴子初舊觀儼自薦嗑山高攬雲雲際抹淡靛慰我塵埃
容嘉此煙雨面山脚慣奔走尉曹分卑賤縣人應指似髻
改顏狀變漂零渠未知憂患嘗欲遍俛仰二十年轉眄閱

蠶電故人半在亡在者或海甸明朝理去楫山影暝江練
安得人如山來往長相見

繁昌早發

客行固塵身畱滯如振翼及茲祖禮竟蓐食理帆席風停
浪未蟄天曙月正白版磯匯湍殺菽港煙樹碧杖策丁家
洲徙倚容少息無酒問山店憶鱸聽村笛烏鳥啼松竹塢
搗下沙磧回柁投曲澳又寄糝潭夕情疎或易合不作淮
楚隔纍然槁項翁軟語慰行役

泊海子口

池口至海口望望三舍外辰發莫已到回首西日在風師
宥憐客祖道煩一啗我舟疑凌虛楚山真歷塊蜚鳥相讓
疾驚浪乃弗逮窮途坐局縮頗嘗得此快邁邁自本圖闕
供恐貽悔未辨問村醪且計具薪菜

泊小姑山

楚山屹兩姑我見乃其稚聞名詩卷間識面客舟次玉刻
極端麗簪植暝蒼翠娟月上天角相與詫嫵媚怒風將我
西未慙卜晚憇山足舟可艤山木纜可繫山外正風波獨
此佳食寐斷知有神物主此勝絕地明朝捐行橐可無答
神賜白鵝雪爲肪綠蟻香馥鼻舟穩風又熟無乃契神意
未暇訪彭郎辭費辨非是

郭家洲

攜兒上絕岸微徑步蒙密人稀鳥島樂老屋幾百室荒涼
郭家洲籬落映殘日問俗得周旋磨門頗蒼卒興衰今昔
殊郭姓尚十七鄰里闕鹽茗翁姬僅盟櫛共說頻歲歉平

陸江浪沒場圃或潭洞椽棋行蟪蛄去秋微收爾樵採取
黔突接耳多樂郊一去恐兩失吾邦有杜母撫我不待乞
蠲租桑柘在休役孫子佚意使流殍無寧後倉廩實官今
薄陽來吏師那容失書紳拜此賜知我佐郡紱古來禪肉
食多自芻蕘出必若窮吏道孰先究民疾剝膚快目前吾
固笑無術

離富池

江流寂無聲明滅窗月曉客枕歸夢餘意先西蜚鳥雪天
信少風翳面正繚繞富池忽信次宥羨鵬鷲矯向免犯險
艱神惠顧豈少今晨有佳興調笑向諸小波平旗脚直康
莊馳驟裹鱗鱗到座隅健鵲啅林杪人家積蘇間山影橫
練表未成官縛去得句吾事了

龍眼磯

甚小而巧魚者聚焉

誰謂石一拳不作江流礙朝來揚帆西棹若驥歷塊龍眼
風火磯培塿視華岱似聞潢潦時亦復鼓湍匯鑿去本不
難奇巧禹所愛其上嘉樹密其側魚網曬居惟羨漁鄉復
欲老犢背西歸儻得此庸敵七里瀨

次臧秀才讀蘇集

秀才甚文予未識也

自我得蘇集玩閱幾忘年汲甘乏脩綆適遠疲短牽取一
九不隨望若終茫然子齒始半我用志超我先晶熒出秀
句妙斲遺雕鐫此翁濠堂奧駢闐誰敢專潢污置不云學
海須百川怪子介且方落筆盤走圓子真蘇門徒豈獨長
短篇平生脩月手不補衣履穿秦黃晁張陳眾星耿霜天
世儒昂其首指似如登仙子起斯人後遊刃牛無全邢娥

望可知衆女空丹鉛何時班荆地解我心懸懸卽今清夜
夢不止懷昔賢

雪夜與師是棋次前韻

投醪士或醉說梅人不渴窮途餘樂事不受憂患邊詩可
供呻吟棋亦識死活朝來喜雪句神藥胎可奪一揮與兒
晤斷無市聲聒旣免沈舟諼不作賭聖謁指冷良易忍眼
花苦爲孽疏置仍作罪隨意略細閱瓜葛勝負間時亦工
屑屑策幾奇兵塵地比弱王割吾非江左管祗犢愈愛說
升沈作豐悴今古無成說家居鼓吹具藉以保晚節掀髯
得一笑爲汝倒蕉葉袖手聽殘更紅麟噓晴雪

再次韻

雪應時可喜晴不遲尤可喜

人間十日雪已潤夸父渴宿雲忽披靡義馭與仰遏春從

九地回旋放牙甲活主張披拂是大塊司予奪椒栢追時
序鼓吹聽曉聒詩壇有同盟辦作衞袖謁得雪晴更佳過
是或爲孽羣山半披剝衆巧獻一閱懸知兵吏集不待鋪
木屑令尹活人手小試牛刀割廣文甘僻左不肖事容說
與俗分樂事盍以韻語說獨慙長鬚送不量好時節六一謂聖
俞曰山婦云好時好節送詩使領兒觥快作湯沃雪趨此梅未葉正

至喜鋪

外朝走馬息險絕欲無路駟駿蹙萬蹄勢若敵場赴崩騰
臨空曠踔足此小駐蕭然一驛傍爲此數家聚川城南山
下邑屋隨指顧行人不勝喜息駕始此處覓然愀然意南
北分來去我解房州印初試歷險步胡爲亦自得不作罷

江漢長翁詩金
十
茶慮鄉心建瓴水歸夢受風絮殘年歸來引他日遂初賦
是役固已勞端復酬夙素臨風搔白首一笑飭徒御

涑口守風

辨舟留襄陽辟風泊涑口得行秋甲辰初到夏癸酉跋鼃
已自慣束髮至衰朽坐是冥得喪况復多病後絕憐揀舟
兒不措脫頰手顧瞻峴山亭覲面可舉取微風吹薄暮霽
景掛高柳涼月欲略箕陰氛尚侵斗明朝起拖計未敢決
可否身已不藉在心自無何有一事萌一意但見掣君肘
擁書坐蓬窗醉我不以酒

赤口灘

漢江多惡灘赤口乃其最前年將家上正值江流殺奔衝
震溝缺狼石森戟鏃轟轟取進寸一跌尋丈退聞此尚痛

定躬履况兒輩今者劈箭去未覺有湍匯一雨動三日遠
岸卷澎湃向者險熾地了不經眼界三老笑相語無復憂
滯礙路可屈指計歸將平心待窮塗偶快意此惠莫謀大
龍公本何心賤子多感慨

旅館三適

予以病愈不食麵此所嗜也以米漿代之
且宜燒猪客有惠清白堂酒者同時製作

三詩識之

厥初木未種移殖雲水鄉粉之且縷之一縷百尺彊勻細
蠶吐緒潔潤鵝截肪吳儂方法殊楚產可倚墻嗟此玉食
品納我蔬菽腸七筋動輒空滑膩仍甘芳豈惟僕餐餌政
復奴禱椰卽今弗洎感頗思奉君王
雋永項上巒紅嫩劣帶勞彼美大欄君坐受羣毛朝鼎涪
走真味正藉松炬燒芼我銀絲窩葱豉巧和調董塗非所

宜淑郁如蘭椒腹腴但下隸擅根合藤條併填長翁腹未
覺喉牙搖但訝大嚼餘無補詩腸枵

佳齊宵見分春意偕客至誰將清白名言代碧香謚起淪
饒磁甌玩吮色香味醍醐復牙頰沆瀣沃肺胃桑落古宜
城不足偕品第我病久不飲此日欲小醉快哉羈寓中乃
遣拜嘉惠一盃先晨飯歛作凌雲意米牒薦燒豬佳此三
者備飽足仍酣醺眇睨人間世

官務

磨隨為官多曉了未更歷今世從仕者萬口用一律文按
日從事賜驚竊投隙自謀脫悔吝初宵計易劇追逮有踵
接符譟動山積豈念南畝民晷刻校日力停犁聽上命質
衣供旅食誰定老我師黠民幾鬼域締彼刀筆吏表裏肆
狙慝奈何食肉人立說與推激此論儻不破此弊終未息
揆予閱世熟敢此論在職

命書

命書唐濫觴委源傳呂後有倡莫為過波蕩今不教字育
叵數計八字詎所囿甲子動埃億舉一百萬瀉荒唐無稽
據誦言指休咎奈何聰達人頗復安此謬懷刺曳長裾偃
蹇文士右夸詡走干謁薦墨不待叩士有待濡沫百請不
一售我昔遊江淮知識間新舊文士不到眼此輩日交筮
辭章輕亟水羨彼行橐富鯁鯁問利祿吾儒所淺陋自笑
與世違迂論取排詬

財昏

師昏古所辭財昏今不耻傳祀合二姓古者貴由禮四德

五可外貨賄亦未爾民風日就頹捨此爭校彼媒氏未到
眼聘資問有幾傾篋指金錢交券奉租米東家女未笄儀
矩無可紀已聞歸有日資送耀鄰里西家女三十閉戶事
麻泉四壁漏風霜行媒無畱趾坐貧失行期趣富曹貪鄙
流弊例不免其源實此起多約或少酬暫譽甘長毀坐令
親舊歡詭譎變狐鬼何況性習間貧富岐臧否土俗未易
挽人情大不媿悠悠何足道吾以諗君子

聽政

爲政貴中和偏徇古無取無心斯善應奸譽乃其蠹奈何
聞見聞往往用心誤扶弱抑其彊古或垂此譽世異俗且
殊處今猶狗故曲直本不昧彊弱豈所據君子不此恤情
僞溷丹素富室被剝腹日有貧窶慮士夫受加陵悔不齒
編戶羸弊取必勝玉色吞氣去不知世富室如母子所怙
不知意定向未語機已露傳繼用一律抱冤莫赴想用是
致和氣南首問燕路

錢弊

爲家重墻垣爲民須貨殖揚廬國百戶東南賴控扼淮民
魚米餘百貨仰殊域用銅防外泄用鐵乃奇畫一利伏一
弊救弊要得策持貨買官券捨此莫衣食錢貨天下用鐵
乃限南北坐令兩淮民塊處斷貿易計鐵取券直十纔取
六七朝賢愛淮民此困盍矜恤銅鐵均國寶通變豈無術
近甸視遠地未可岐畛域况今苦倒垂倚待振焚溺緣江
八郡爾雜用顧何失官券朝北來淮俗暮安宅卽今私鑄
斷胡尚膠今昔吾貧復淮人計勢不容默

吳節推趙楊子曹器遠趙子野携具用韻謝之

平日從俊遊寂寂坐多病犯床漫飛埃瑤笙罷重請犯床置樂

器床謂宮調相犯修樂器惟笙日請昔遊喜復到風物他日盛坡恐名燕支

樓亦詫端正新交間舊友氣合宮羽應譚塵水霜厲筆陣

鸞鶴勁吏隱分樂地與世不好徑拔貧辦一歡挾貴輕百

乘四豪載酒過講德珠璧映歌奏雲近人舞罷鸞顧鏡

醉忘主賓笑語似紛競朱樓識阿眇白酒醉師命明朝耐

殘醒江聲醒幽聽此樂謫仙後同異君試訂四豪成風手

可但隻字警我投詩社名拜手敢貌敬

記夢示師是

青燈寒夜思吾鄉合眼便坐吾家堂阿丁炯然目如水絲

衣翩僊趨我傍中心喜之謬督過還為遨嬉廢書課指似

斜日西窗紅小賦未破書未供向渠不敢恩勝義亦憐忸

縮不自容蝶蜚鹿失忽驚寤撼撼霜風在庭樹幾時筆力

跨乃父與汝相忘不關慮

題胡處士猿麋圖

畫工神品今代無神嶽一脉傳醉胡幾年傲睨不落筆乘

興掃出赤縣圖今君所寶亦第一我疑神遇非有筆青林

紅葉晚未暝遙山遠水秋一色五猿踞石相因依兩猿掛

樹松枝低仰睇側顧麋善疑其二行齒如不知昔人畫馬

師廐馬畫山直付居山者野猿不馴麋易驚邈影渠能寫

閒暇草露空荒遠刀机即今放麋誰氏子山峰負毒不足

憐盍貸蠟蛸畱報喜

布穀吟

人以布穀為催耕其聲曰脫了潑袴惟農傳其言云郭嫂打麥浙人解云一百八箇鳥何

與人事人以意測之是非皆不同爲作此

潑袴不容脫鳥語徒慙勤輸租質農器有袴那解新官中
催科吏如虎告時趣耕爾能許卽今春種未入田安得縣
胥知愧汝卑棲俛啄良易謀聒聒疆任田家憂啼時未旦
夜不休班班血痕銜口頭人將近似測禽語汝意真解憂
農不或傳悍妻天所怒姑不可撾渠不顧罰爲此鳥聲曩
愆警世毋爲郭家婦南方諛佛古到今人持數珠家梵音
區區說似一百八譏訶勸相知何心浙風淮俗隔江水意
解禽言乃如此蘇黃妙句誰嗣之兩地流傳併須紀世間
儒墨紛相攻巨細彼此臧穀同爭如痛飲固長晝付渠馬
耳謝東風

墾山叟

雜木漫山誰所種居不臨流多不用九月霜風捲黃落羣
山一夕皆班駁遙看拖帔橫祿衣農家刈粟山有畦家家
墾田日嫌窄荒林翳蒼蒼惜虛擲斷荒作熟不掛籍輸官之
餘給衣食州中之政常近厚不欲屑屑校升斗寧其棄之
聽民取實亦藉是作康阜繼承不皆惠慈守汝須彌縫吏
胥口防有後來規稅畝

竹米行

竹君亢宗擅楚墟一一脩聳山澤臞風流秀整與世殊楚
俗食息皆爾須薪之籬之且籩篋筭筥箱筐篚籃笥溝瓦
厥祖羨其雛隨索斯獲掇諸塗今歲麥秋旱歲餘得麥僅
足償官租竹君憫農如士夫著花結實千林俱密砌玉粒
緩旒珠株株擷取雖錙銖彌頃亘畝無閑株磴磨蒸炊勝

江漢長策詩金 十五
雕葫鄰里乞索水火如坐令輦蹙興歌呼野叟好事能分
吾香清而冽甘而腴此君行能不一書此惠及物旋就枯
摩頂放踵忘其軀所學無乃墨者徒老子苟祿天之隅袖
手無策蘇婢孤投七三嘆吾慙渠

田家歎

五月之初四月尾菖蒲葉長棟花紫淮鄉農事不勝忙日
落在田見星起前之不雨甫再旬秧疇已欲生龜紋近者
連朝雨如注麥隴橫雲欲殷腐如今麥枯秧失移舉手仰
天禱其私秧惡久晴雨害麥兼收並得寧庶幾餅托登盤
米藏庾儂家歲寒無重糶豈知送日戴朝星凡幾憂晴幾
憂雨吾儕一飽信關天下筋敢忘田家苦

春雨寒甚作長句

白龍天飛宜莫測吳儂解數歸消息年年青帝發生時妒
妬園林春動色西山龍母誕彌月歸覲親顏供子職壽觴
瓊醴俗共傳玉鱗素鬢誰所覩酸風鼓寒苦霧塞行人縮
頭欲僵立蛟鼉凍蟄大木拔更問嬌紅并眉白閉門三夜
淙簷雨起視溪流高數尺去年夏秋走祈崇雲電收藏日
血赤儂家倚鋤望眼穿白汗呀流地龜拆天可問曷不遣
兩龍此時會生日

謝韓幹送絲糕

玉顆瑩澈珠就磋吳鄉早秔莫計過無乃風露秀結異移
種崑崙之木禾國家厨婦一百技三春九浙付重羅銀絲
千尋忽縈積中疎外潔生搓揆扶桑仙蠶大如盎線之本
供織女梭恍驚萬啄鬪新巧習作水茸雪網窠卽今擬形

供食事纖手幻出千絢多倒甌入筯第三絕色香兼味皆可歌周官賓祭珍饗餌有此復具理則那詩翁物色及糗糒得此來前當見訶鱸盤漫詫金縷飮湯餅徒夸銀線窩瓊酥玉膩信非匹胡麻崖蜜仍相和感君汎愛記衰朽回首一笑分餘波腐儒口實長作累饑鐘之名定不磨金山別去每掛夢老眼復見還雙摩婪酣得飽問便腹如汝平生相負何更從公子乞方法日當飫之老澗蕒買出二頃不種秫未怕酒客來操戈糕不用糯金山者名天下

識村翁語

勸耕淨居村翁老而健問其壽云山居淡食乃爾昔一村叟一野僧皆壽百二守杜郎中史丞相呼而致敬厚設而歸即逝二人壽未必止此厚味非野人所饗也其言有契予心作此記之

山僧一生饜山蕨溪叟所仰纔魚菽闔守侯家與相家珍膳不應填汝腹百二歲翁清且羸茵坐鼎食寧其宜焉知暫飽博長往穀神震怒脾媪悲官家顆粒皆民力此祿食之須此骨兩翁妄食壽弗延當念無功暴天物我雖不偶猶餐錢車行肉飽隸後先食功揣已懼不稱因翁有言呼使前盤几畢識翁所言

繁昌縣感舊

繁昌古縣依山麓縣外峰巒更重複連山斷處圍平陸有地可耕無十六昔我作尉三年畱局促似為山所囚野行村宿飯古寺山路纔悉如吾州車如鷄栖馬如狗風袂塵襟博升斗是時身健髮熟班頗復興懷為奔走遠近人家山影濃與我周旋圖畫中山鳥翔集相和應野花開謝能白紅薄宦而今更長道回頭祇覺當時好筋骸罷憊髡摧

顏不歎飄零歎吾老

出郭

寒食日迂使車初甚悵悵郊外春色慰人戲成

江縣居人寒食下少在縣中多在野哭聲不似笑聲長麗
服新粧盡遊者長郊芳草接天綠我亦行行策罷馬盍簪
命醉豈不懷卑官出入元無假偶來却勝特來好觸處春
光可圖畫幾日陰寒風用壯今朝霽景天所借趁人胡蝶
作團蜚逐婦鳴鳩數聲罷夭桃艷杏雖已過郁李金沙猶
未謝其餘紅白爭姘媿醉態啼粧各蕭灑顰風笑露頰欲
語半吐梨花最閑雅游人幾許健倒去紅粉誰家短牆亞
良辰獨醒還自惜指佩一樽猶可貫餅盤錫筴已寒盟故
人應問花應訝對春長作了事癡不念清懽本無價會當
從公謝不敏百罰深杯不辭把魏花有約待人歸秉燭酬

春期後夜

望夫山

亭亭碧山椒依約凝黛立何年蕩子婦登此望行役君行
斷音信妾恨無終極堅誠不磨滅化作山上石煙悲復雲
慘髣髴見精魄野花徒自好江月爲誰白亦知江南與江
北紅樓無處無傾國妾身爲石良不惜君心爲石那可得

檢早宿香雲

香雲之山瞰平楚松篁路窮得僧宇明窗深室皆巖靚白
菊紅渠相媚嫵它日欲來坐忙迫此行怱怱寧得所蒲團
憇定飯秋蔬衣袂黃塵尚如許山僧其語豈須禪但愛茶
甌如潑乳投牀有夢不能記忽聽風林如過雨鷄聲不二
擁被溫又恐罷驂陵險阻出門便覺仙凡隔猶聞窸堵風

鈴語今年早曠遂無年枵腹顛天連保伍頗能念我困馳
驅兩兩致詞相勞苦但使秋租毋病汝吾自卑官慣塵土

謝朱宰借船

宰為蕪湖子官繁昌

書生祿邀空自憐三年官滿囊無錢身如絆驥心千里安
得一舸西風前令君磊落濟川手留滯亦憐窮獨叟大舟
百尺影白虹借我搬家我何有函牛之鼎著鷄肋涓滴渠
須瓠五石劣雷兩席冥圖書輦石囊沙壓搖元典衣買酒
餉三老槌鼓鳴鑼人看好相過重讀借船帖我自盧胡君
絕倒自繁昌歸先經于湖

田家謠

麥上場蠶出筐此時祇有田家忙半月天晴一夜雨前日
麥地皆青秧陰晴隨意古難得婦後夫先各努力倏涼驟
暖繭易蛾大婦絡絲中婦織中婦輟閑事鉛華不比大婦
能憂家飯熟何曾趁時喫辛苦僅得蠶事畢小婦初嫁當
少寬令伴阿姑頑房謂嬉為頑過日明年願得如今年剩貯二
麥饒絲綿小婦莫辭擔上肩却放大婦當姑前

徐南卿招飯

徐郎陋巷四立壁乘間亦戒賓友食慈親衰鬢不供剪定
賣春衣典書冊念君治具良騷騷與渠侵早來得得小樓
十客不餘地猶勝陶翁劣容膝江西米槩絲作窩吳國香
杭玉為粒嗣宗阿戎各好士笑頡頏鄙仍婦德老子旅寓
得此飽勃鬱詩情喙三尺出門未妨雨墊巾萬展聲中緩
歸策

再次韻

東隣客來每堅壁西鄰客來常葦食旅中一飽豈細故偕
舉大事書之冊末路孜孜食眠計外此敢忘戒在得蘇端
向我顏色好衝雨不辭泥沒膝居貧頗禁惡客惱念子秤
薪仍數粒肺可用禰米可餅併付饑僮飽君德人謂裁詩
等裁錦拙婦渠能把刀尺陶翁冥報苦未賡搜攪肝腸閉
倚策

再次韻

白晝曲肱睨東壁鷓斯空復賊糧食晚途白笑硯生埃少
日頗常韋串冊生世恐隨草木腐忍使功言兩無得長安
寧無翁耄者自宜有鐵關腰膝樂天任運時近酒子房逃
榮猶却粒求窮我者迄未知夫此誰怨夫誰德擬訪鶯花
豁襟抱門外雨餘泥一尺山陰不待興盡回掠面東風寒

策策

戲作

飲食小過不佳趙帥招飲淡食止酒因成古詩

書生稟賦紙樣薄平日扶衰惟粥藥一日飲濕小啗肥河
魚數日煩醫治佳辰府公約把酒嚴斥厨丁預節口借問
王賓醕酢餘還許公榮袖手無厚味腊毒古不予如作病
何仍古語生世例非金石堅支離如我更可憐饑噉動使
諸病入冷坐亦復百憂集彭殤瘠肥本自齊此理祇許蒙
莊知筋下萬錢無足取厨薦三韭徒自苦法士語飲應且
憎何如卧客懷中醉不應婪酣任人嗤穀伯何如辟穀高
人師黃石陳遵張竦柄鑿夫何為彼此未可相是非七十
老翁誰能促戒縛此戒醉死病殂吾命在

呈趙帥

訪帥困于腰鋪次日帥聞到招飲

雨行本自貪風便四十里程真劈箭長年攤錢夸半仙一
炊黍頃風頭轉生世快意多所辱葉舟瓠壺浪如屋暗樁
觸船船版折船丁顛天船媪哭塗窮儻有哀王孫腰鋪人
家緊閉門丁翁祿邀捕魚者向我顧官顏色溫茅屋新成
客寄宿麻茶初熟仍見分解衣滅燭睡欲死鄉夢醒時雞
喚晨平時晨舖下南浦定向揚州聽更鼓飛廉生憂吾敢
怨薄命若爲防市弩今朝河面吹細痕竹樹不聲入駿奔
掣鈴一笑話疇昔便有樂事酬佳辰鎮淮主人開淥樽蕙
蘭香前簫鼓喧一盃爲我安驚魂勝談壘壘清耳根向來
憂虞無足言

山居四首

山間有好事時宵問何如東送筋頭薤鮮分匙面魚披襟

借我飽攬髮爲君梳一笑塵勞外都無病可祛

忽作斷過訪經旬閑瘦筇慵添和詩債病減灌園功石鼎
裹輕碧庭柯零碎紅竹君如見慰竟日嘯窗風
鳥息我亦倦行行取徑微石稜妨錯足藤蔓每鉤衣森木
各天籟連山同夕暉推門吟袖冷滿帶野風歸
涉世慣多還還欣愜此心鷄孫當歲稔竹母值秋陰言配
香秬軟行須綠影淡繼今摩腹去風日更蕭森

香雲寺

山月明空隙庭柯下槁乾沉沉僧夜淨漠漠鴈天寒夢境
愁偏隔詩情老易闌未容辭水厄聊復踞蒲團

圩上

小村山影裏山脚水明沙春事初移柳人家未摘茶生兒

了門戶饌客有魚蝦笑我塵埃者奔馳鬢易華

丁酉道中暮春

去家如昨日節物轉頭非風處綠自舞雨餘紅頓稀野橋
平水過村路躡花歸趁得酴醾在箏琶拂舊衣

得姪消息

甚喜年穀熟仍聞佳食眠郡人新過此鄉信得真傳社酒
浮蛆淥湖魚割玉鮮平時計安穩莫靳里胥錢

金地寺

側徑崎嶇去飛蘿次第捫山橫欲無地路轉却逢村竹栢
圍荒寺莓苔上繚垣殘僧不知客芋火老雲根

陪盱眙王使君東遊四首

錦席浮波影牙樯轉霧霏飛花窺碧酒舞蝶傍紅衣野日

歌前淡雲峰望處微游魚應與樂啼鳥莫催歸

纜解鷗飛處船移柳影中林廬桃李月浦澈蕙蘭風酒淺

能無醉歌長惜有終賦詩聊泚筆寓意未須工

紅旗圍皂蓋離邇碧山隅水色涵雲樹賓筵著畫圖香溫

金鑿落花亞錦屠蘇醉裏銀絲鱸漁舟不待呼

風林山闕處茅舍兩三家小駐回鶻隊重尋粟玉花疎煙

橫暖靄碧溜激晴沙野興未渠盡數峰明晚霞

都梁

淮汴朝宗地孤埤只眼前譙樓西日淡戍鼓北風傳破竹

非無計澆瓜亦自賢客愁渾幾許撫劒倚吳天

天外纖雲盡山巔望眼遙平淮剪綠野白塔界晴霄客裏

風光異吟邊物象驕功名它日事回首興蕭條

關塞淒涼處青徐指顧邊如何漢正朔不盡禹山川將略
輕三捷天威重萬全諸公不愒日老子判畱年
路惡惟沙磧山回忽市鄜樓臺明晚照花竹暝寒煙生事
知無警懽聲驗有年猶嫌武陵遇不載割淮鮮
犬吠蔥青裏人家竹徑茂短籬循石礪老屋枕煙岑牛瘠
知春事鳩啼認晏陰豐年易爲客盃酒慰幽尋
年年漢臣節春鴈與同歸番俗尊華服皇家後武威市中
斜髡賤水外拂廬稀南北皆生息和戎果是非

雨後病起

小卧竹間齋幽懷得好開病從涼後減雨及望時來兩屨
山千疊諸雛飯一杯吾生計此耳無夢到燕臺

客中

多夜淮瀕夢言歸未有期愁禁客舍雨寒過杏花時酒廢
無何飲春如不自持若爲丹九轉能黑鏡中絲

次瓜州

雲曠平山塔煙明老漚城客行判費日舟泊細論程開水
清兼濁潮天雨復晴未須歸有夢午枕愜涼生

贈趙秀才

袞袞紅塵去扁舟得挽回半生障日手一笑沃愁杯應俗
吾衰矣論文子壯哉明年日邊信滿冀好懷開

定海

齒髮今如此東來料一寒愛民平日事宰縣昔人難稍得
官租辦聊容坐席安渠儂趨負輓疑未厭兒寬
官廨鹽煙外居人雜賈胡聽言須畫字討海倚輪租習俗

何妨陋鮮肥頗不無已廿三載住疇昔計乘浮

聞師文過錢塘

九堰三江外欹帆側施頻海鮮常入筯雨鵲定隨入椒酒
須分歲江梅巧借春團樂多樂事未殊物華新

官居

官居不惜日宰縣動三年忍事腸欲爛為防頭救燃不應
一飽計長受眾人憐俛仰堪供笑人間海易田

送學生歸赴秋試因省別業

年事真無賴官曹已憚煩兒堪付門戶吾粗有田園遊舊
因相問襟懷為細論此心歸隱計日日受風幡

食口幾鵝鴈田收問菜麻子美力難及黍稷得種菜與麻寧堪再攬減淮人

謂歲飢為又抱兩嘔鴉越人以嬰為嘔鴉投老憐漂泊何時了貸

賒終慙陶靖歸不計生涯

高頭山

小駐緣雲脚居然睡眼醒楚日銜樹澗漢水挾山青蹠躩
初忘倦蠓虻已飽經川原方啖蔗不擬嘆漂零

無題

薄宦受風梗還家歸岫雲行人與喬木老色竟平分末路
慙周朴窮交有墨君看渠緩若若干騎詫鄉粉

書懷

俛仰人間世纔為一笑資百年羊脚熟萬事虎頭癡文字
聊遮眼功名浪朶頤浮生如此爾况復病餘衰

次韻楊宰次郎裴

時予亦留西鄉因述懷

信次尚村落食眠隨曉哺山瓶餘瀝倒村人以野僧字謁

伊蒲笑挾兔園策問收魚澳租前灘起漚鷺爲我作前驅

次韻楊宰葫蘆格

生常信流坎老不歎漂零雪後菊未死雨餘山更青仍煩
折塵語遠寄打包僧政績隨詩價多君日日增

次韻張守塗中逢節

向子房州之行亦舟中作歲節

塗中歲道盡江影暮澄凝栢酒惟宗武河梁似李陵問津
田叟傲挾施長年能繫纜纜沙背人家已上燈

次宿北阿韻

聞道藍輿去遙岡復近阿詩應吊孝逸碑或贊頭陀靜者
官糊口公朝禮作羅憐君日阡陌塵土撲陰何北阿李孝
業處

卽事

側徑苔竹潤短籬鷄鶩喧小停障口手聊憩卧雲村綠影
烏皮几新醅老瓦盆平生農圃計重與野人論

再用韻寄丁知縣

南樓酌酒未分襟啁鵲啼鳥亦好音晴日倒紅生笑頰煙
梧搖淥漲盃心可堪歲月供行色盡把江山博醉吟不繼
蕪湖畱十日焦峯浮玉恣幽尋丁爲蕪湖舊畱子必以十
日爲約

念衰

心意彫殘底自娛每臨清鏡笑頭顱詩從多病難爲好官
過中年劣勝無急景驅秋著髭鬢歸鴻銜夢下江湖更應
載酒高陽伴誤輟歌呼話故吾

閑適

丁年故紙枉埋頭老去時名底用求得句蓋嘗身被謫屏

書姑免眼爲仇關門工作橐馳坐閱世已冥鵬鷗遊槁木
山麋真適適從來里舍議家丘

次韻蘇監倉二首

時蘇兼主邑學

交朋又得一相如高掩虞郎行秘書妙論析微驚我倒諸
生到眼可人無一官幸此分鄰燭五字渠能攬虎鬚快讀
清篇病如掃北軒風竹對森疎
長日奔馳傳置如久妨著論與抄書逢人爭席有時有疥
壁畱詩無處無禦寇未辭躬楚製論文常憶攬桓鬚扁舟
再有東游便宜向朋從自作疎

縣西

一徑斜穿犖磳行身閑尤覺馬蹄輕坡頭嘉樹千幢立煙
際長江匹練橫茶鼓適敲靈鷲院夕陽欲壓赭圻城一春
簿領沉迷裏野鳥山花眼最明

寄幼度主簿

辭家暑雨濺紅渠轉首薔花已雪如歲月祇隨流水逝笑
談陡與故人疎簡書我正罷長道歸棹君行指舊居他日
霜風吹夢破空從旅鴈覓來書

七夕

龍旌鳳扇一相迎知費青禽幾寄聲天上經年纔舊約人
間轉盼便涼更涼河只向樽前落微月偏來酒面明後夜
玉琴彈別鶴獨應乾鵲夢魂驚

復程平叔

早歲雄文手自編偶同聞喜聽鈞天漫爲官去吾何取宥
寄詩來子定賢潘岳自憐頭易白士安况苦病相纏羨君

身健須如漆萬里亨衢穩著鞭

夏夜飲客

砧砧官曹興易窮得閑何惜一樽同
傷愁邊到無惡客從竹間來皆好風
勝日詩狂輸酒聖轉頭渭北復江東
雕鞍未作扶攜去更放蘭釭子夜紅

寄陳居仁

尚記誅茅柳外隄水光搖霧潤窗扉
桑間曾是僧三宿海上能忘鶴一歸
野店樽壘醅脚醜比鄰雞鶩稿頭肥
解顏一醉平生事更向行藏計是非

贈仲國美

前年春國美亦留夜飲云

三閱春光一建瓴依然歸棹泊危亭
鳥迎客子各頭白柳學故人俱眼青
曾是縱譚僵婢僕又成豪飲卧壘瓶
明朝

小話前溪別分付溪風管醉醒

贈趙秀才

平生心事釣漁舟解后青衫映白頭
官為功名戲雕虎不畱顏面對沙鷗
露薄青蓋高荷曉風約黃陂小麥秋
入眼斜川歸趣好此身何處不菟裘

京口呈張閣學

歸懷未用話南園卧治于今又北門
但息兒啼寬上意小稽靈擊取中原
虎頭銳視非無種獬子當觴且勿喧
更恐譚公家世事斷無宜勸定驚魂

時迂北客故云

約二同年遊虎丘

兼旬閉戶耐寒威起視晴空碧四圍
黃鳥啼邊忽遊子白龍去後漸單衣
年時尚記尋芳約老境仍憐得醉希
紅影

幽香虎丘路杖藜攜酒莫相違

次韻張丞二首

夫君腹笥盡奇謀每叩談鋒聽不休
誦賦久嗟無此作薦賢端合拔其尤
小遲榮路觀掀趨聊爲同寮蓋謬悠
政恐諸公有推挽平時果藝仰由求
槁梧閑據自沉吟投老真成負此心
酒沃渴鯨悲事往官隨跛鼈笑吾今
進爲終愧周人朴歸去曾無陸子金
尚賴君詩慰牢落時清聳曠發純音

卽事

江漾晨光入縣門樓斜晚影到漁村
海聲不爲無風靜山色居常帶霧昏
問俗卽今防愒日來時撫事錯銷魂
浮生寄寓君恩重未覺天涯異故園

勞農淨居贈皎啓二僧

勞農今喜復南轅夾道扶攜亦笑誼
縣尹庶幾無疾病山人迎送耐頻煩
茗葱湯餅聊堪飽出瓮春醪半帶渾
惟有爲民真實意異時陳迹付公言

九日登樓

海上重陽率多風雨邑寄罷飲作

縣曹逢節猶忙迫陰雨乘秋每接連
九日歡娛異前日幾年晴霽有今年
湖山入座褰珠箔萸菊揆香薦玉船
帽委西風判一醉故人應未笑華顛

再次韻謝張守得新居

得巢歸翼愜卑棲尚卷風茅落凍泥
病樹綠階旋培植舊書堆案細籤題
地非新野聊龍卧人似東屯賸客迷
身世只今俱冷笑百川東注月行西

對客再次韻

客來一笑同鄉味便粉秋菰刷藕泥糟滷子薑仍舊法籠
緘乾笋儼新題白魚紫鱗空濡沫窘兔驚麋想矚迷自揣
臞儒合蔬糲放麈終恐愧巴西

自適

渺漭湖天入短蓬心期祇許白鷗同人言火食闌蓬客自
命官身田舍翁酒可銷閑時得醉詩憑寫意不求工更那
長日溫書眼一送蜚鴻下遠空
雲水爲家百累無意行從昔畧方隅飲忘醒醉狂常爾夢
到無何午未蘇遺俗可辭翻轆錯付渠陰作負舟趨謔謔
禮法工相聒閉戶仍防大小儒

登平山堂

平山堂上命琴樽前輩風流宜見分戀客懶斜當檻日藏
山不斷隔江雲吟牋得意窺天巧醉面禁涼減纈紋杖策
歸來新月上落梅如雪點風羣

春日客中

平時謾說醉爲鄉對景今如石作腸老去猶興客中歎春
來剛制酒邊狂露桃煙柳爲誰好蜂蜜燕泥徒自忙紅紫
打圍歌笑地暮年多感怕思量

山行寄程帥

雨餘支徑濕平沙恰稱卑官下澤車雜樹暝煙森立槩亂
峰迎客儼排衙水禽時弄翩僊影野草爭開細碎花久憶
山行此如願不應回首更思家

次日再次韻

鷗雙鷺隻傷汀沙却匯沙汀過客車清吹解撩叢竹嘯高
山如受衆峰衙寒生碧澗懸魚網潤著蒼崖賸土花所惜
隔牆紅紫滿行行無暇訪山家

復次韻寄程帥二首

節物匆匆可挽追直須樂事趁芳時行春倏喜花園屋借
景何殊月在池南昌當官借景未妨民恰似擊池取明月對酒不無桃葉女扣
舷却笑木腸兒山家有約須重到定放遊人張水嬉
人家襖被競攀追刺史春遊正此時羯鼓聲中花作錦壺
籌多處酒爲池絕須絲竹娛安石賸有篇章付雪兒聞道
續貂容下客老無佳句坐荒嬉

騎過山村

煙村面勢枕蒼山一徑循山作屈蟠入望高幢羅翠密掛
空匹練啜清寒吟髭然白迎風去粧面駢紅倚戶看頗似
騎驢后山老倩誰粉墨灑毫端

寄鄉中親友

棋酒游從歎離羣酒林吟筆漫飛塵潮乎可奈才力老甫
也尚爲南北人安信不隨秋鴈到流年倏復野梅新南岡
北阜憑高地引首吳天幾愴神

再用前韻贈高司理

吾宗如此况他揚碌碌諸雛欠宥堂薄宦幽憂殊未醒故
園歸夢可勝長盃盤頓頓家雞嫩翁媪鳴鳴社酒香猶記
比鄰笑行客夏畦龍斷爲金章

上巳溪上燕

杜若洲邊卓旆旌佳晨一醉萬金輕春光僅有一分在天

氣可能三日晴解道蘭亭亦陳迹有吟楚些愴幽情人生到處皆兒戲笑看爭標兩鯨

再次韻荅許節推

新釀開缸淥蟻浮舊辭仍缺唾壺謳宦途要處難插手詩社叢中常引頭倒載有陪山簡醉反關莫厭孟公畱秋田粗可供佳客不比封君亦素侯

書懷

人間窮達命污隆作意功名欲捕風但見劉班誤車子何曾鄧禹笑王融官曹得飽餘何事書課乘閑亦雋功少待尊鱸付張翰一溪風月放船蓬

再次韻謝高幾宜惠詩

小家茨竹卽爲堂暇訪溪林索豫章平日牀頭但周易看人筆落便靈光庠隆賦質嗟多樣良楛論材要當行莫向黔婁問奇貨長沙舞袖可能長

歸歟老秋

已辨求田問舍謀登臨那復更悲秋蟹肥與客爭先把稻熟催兒徹晚收霜後峰巒添峭措波間鷗鷺劇風流寰中勝處天應惜付與癡兒祇暗投

宿何人家

步尋松篠款谿舂忽到孤山處士家十頃蒼鱗漾墻角一鉤寒玉插簷牙杯行不乏紅絲餠飯了仍供白露芽把臂傾舒吾已怯又分離緒上歸槎

凌晨張司戶惠詩次韻

小駐江干接雋遊涓清涇濁可同流假真笑我陳驚坐造

妙推君趙倚樓姓字已高時輩上功名尤忌鬣毛秋等閑
莫學金華伯碧水如天擬夢鷗山谷詩夢作白鷗去江南水如天
仕塗決矣息交遊姑向林泉訪勝流短褐直甘乘下澤異
鄉終勝賦登樓驚心夢境檀槐戰屈指鄉園秫稻秋雉翳
龜焦緣有用未聞金彈中沙鷗

西林訪鉅師師頗能詩

天將宿雨淨春空却著湖山鼓吹中載酒言辭藉花伴運
斤來看斲泥工前身師定參寥子拙宦吾今張長公俛首
人間皆長物未妨分饗北窗風

夜宿商卿家復用過字韻

萑蒲無警南塘靜歉歲村區鼓罷過更喜良宵共譚塵幾
宿親手剪燈花酌無多酒仍餘味嬾不吟詩政自嘉蝶夢
蘧蘧纔一霎鄰鷄啼罷又啼鴉

晚飯商卿家用前韻

我似長松久卧沙迄今諫鼓夢猶過倚消愁斛人如玉欲
近書籤眼有花投老無庸尚強聒過君每宥具柔嘉焚酎
得飽行摩腹不省饑號有暮鴉

重九山陽儀真兩使君送酒

酒會文期興尚濃佳辰一笑坐天窮兩州各遣六從事九
日俄成一病翁詩不受催空急雨帽無緣落任西風明朝
晴徑通行屐却漫枝筇遠菊叢

次韻高賓王見投

殘年病眼苦眵昏盡屏甘腴誓綠樽龍樹難逢刮膜手孟
公顧有獨醒孫頗煩十吏供揮掃無奈諸峰役夢魂友義

惟公記衰疾新編官到雀羅門

病念還家可奈愁客中日月急梭投土花暈壁迎梅雨海
燕將雛送麥秋霑袖正憐珠隕睫關門能復玉爲舟搢頭
閣膝高春卧黃妳青奴共此樓

再次韻自詠簡賓王二首

魚辟清澄鳥愛昏陶翁歸計酒盈樽山田雨足鳩呼子籬
援春溪竹有孫百首旋編新賦詠三生猶憶舊精魂小摩
他日紅塵眼閑送蜚雲過海門

庾郎胸次枉堆愁馮衍才名迄不投歸去來今歲華晚末
如何矣鬢毛秋令感心事千年鶴張翰生涯一葉舟回首
月堂金谷夢却憐海蜃結飛樓

次張學錄韻

燒香爲后山展像拜太虛誰能作九原候蟲弔寒墟
雁鴨久欲忘食蛙近亦稍人言淮浙殊得飽不汝較

再次贈張學錄韻

李蔡下中爾萬日指鸞騰何蕃頭欲白秋窗耿青燈
張子攜詩來危坐撥芋火三問笑不對政恐非助我

次韻錢倅諸公睡杏花

釣窗玩孤芳殘月衣上明紫囊折蘭麝小風弄初晴
泊上虞驛來日行

梁湖莽蒼外後去未云遲縣市容吾戀江湖不汝期

早夏

安石榴花猩血鮮涼荷高葉碧田田鱗魚入市河豚罷已
破江南打麥天

滿地榆錢未掃除，畫簷忽復燕將雛。
風窗夢破搔頭坐，重課兒時讀了書。

題趙秀才壁

日日危亭凭曲欄，幾山蒼翠擁煙鬟。
連朝策馬衝雲去，盡是亭中望處山。

謝兩知縣送鵝酒羊麵

僧樣齋厨水樣官，饑憑脫粟食無單。
不因同里兼同姓，有念先生苜蓿盤。

次兩知縣韻

老去棲遲八品官，劔隨溪海訪田單。
東鄰未省吟髭斷，笑擲牙牌命肉盤。

寓吳門

張監番居平江率趙守袁憲月助桂玉費作

溪翁園客問何如，可諱浮生百計疎。
不憚典衣規得酒，長因乞米術能書。

典闌猛輟凌江棹，重看鶯花茂苑春。
歸自乘流畱亦好，浙風淮俗總宜人。

紹熙壬子勸耕妙勝

桑條麥隴接比鄰，社酒家炊丐路人。
風俗尚如它日否，憑誰細問故園春。

定海甲寅口號七首

長官清苦舊傳聞，檢放禾苗近四分。
畢竟不緣胥吏手，早頭科斂枉紛紛。

田租有約不相違，比着豐年數已虧。
一飽分明郎首賜，幾曾刺口問抽單。

已抄口數報隅官歲後朝舖定不難且願眼前疆健在趁坊討海過冬寒

水泛溝塍意欲饜凌晨還復雨廉纖早秧未領其感切猶須

補晚穀無多不更堪直廉切

父子分頭上海船今年海熟勝常年官中可但追呼少不

質田輸折米錢

人家兩兩捉春歸笑語相過復嘆咨共說颺頭前夜作幾

人苗網罟流尸

連宵飛雨喜滂流已入梅天過麥秋二十年前如此晚金

城地抱却全收

謝張德恭送糟蚶

德恭師文友也

壓倒淤泥白蓮藕半指介甲露穠纖玉川水厄那知此急

具薑蔥喚阿添

慶元冬再到盱眙

虎頭山下參天柳親見栽時共我長柳自摧殘人自老半

生不抵熟黃梁

日行竿礪面孱顏舊慣山居意易闕見說煙雲瑱嶠碎此

人爭指畫圖看

閑居

營隙地

頗事栽種隨遇作一詩前後不同故無倫次

雪雲脫壞漏朝陽風物橫前引興長紅糝紫蕤今次第遷

鶯來燕費商量

種桃接李不辭勤旋作花前把酒人羨殺文禽映花語飛

來趁得見成春

春來敢自貸衰慵正要檀欒間白紅愛竹少畱枝策徑灌

花分破著書功
步屨歸來未覺勞
迎門喧笑問兒曹
笑翁渾似魚千里
小圃周圍日幾遭

客夜不寐

陣鴻鞦韆上雲衢
夢欲成時每破除
少睡更堪寒夜永
新來熟過少時書

江行

帆桅飛去劃空明
人倚東風兩翼生
世事快人如此否
日斜三百不留行

到房交代

簷外浮嵐暎翠堆
道人親眼爲渠開
食錢官簿何須計
直爲南山亦合來

復次韻

昔上瞿塘豔預堆
盤渦如井放船開
山行歡喜今非錯
備見梢瀆擎漩來

地有錯歡喜山

十里髻鬟誰縮結
半天蒼翠自嶙峋
教兒莫憚依山住
澗領裁衣盡土人

題驛舍

客到淮鄉話楚鄉
長將天末指襄陽
如今漂泊君休問
又過襄陽十舍疆

房陵十首

似聞僊伯厭乘龍
常混紅塵市井中
靚面未須趨避我
褰衣無計效尋公

房人謂巧避云趨避力尋爲跟尋趨七靴反跟音數

陰晴未敢捲簾看
苦霧濛濛鼻爲酸
政使病餘剛制酒
一

孟要敵滂朝寒

晨起霧久乃開土人目曰滂朝

祠壇歌舞雜嗟吁下酉猶濡上酉枯誰謂朝來一拆雨歡

聲已覺沸通衢

潯水溉曰酉得雨曰一拆雨

竹屋高低正復斜蔚藍影裏著人家底消山峽三分瘴爭

課盧仝七碗茶

土人晨飲茶云勝山嵐氣又曰房三分瘴

夏田少雨富來牟多雨何妨穡事秋已戒日供皮子麵更

教晚稻飽霜收

麵皆麥不麥者曰皮子麵稻待霜乃收曰飽霜米

跨牛待得夕陽回在處諸嫗笑口開已借蠟錢輸麥稅免

教緝捕闖門來

弓手下鄉日以緝捕

杯酒清濃肉更肥咸言趁社極歡嬉丁寧向去坐年日要

似如今斂脯時

年日飲食日坐年社日日斂脯

農閑閭里有逢迎白飲傍邊骨在羹老稚不妨頑過口邊

頭難得是升平

俗謂戲曰頑羹曰骨在

刈罷秋禾未敢慵更須趁逐過殘冬城中竹筴今年貴鹽

茗新來免闕供

賣栲竹供爨曰竹筴古巧反

翁媪同圍老瓦盆倒蕩新酒雜清渾視南視北皆春社日

放烏犍卧晏溫

村落所聚曰視

春寒

掃雪堦頭曉未乾東風作惡鼻仍酸西園點檢江梅後祗

有櫻桃不避寒

稍稍春光到眼中衝寒試與小稽筇杏花已尾櫻花拆正

要淡紅間淡紅

清明寒食經旬是笑問風寒更幾餘小杏惜香春恰恰新

楊弄影午疎疎

平明欲斂雲復厚薄晚未休風更顛老怯春寒不宜出下
惟添火擁書眠

不寐二首

改變年來所著言依沈
紅房隔華胥寒更何與衰翁事數
到淨擬殺點餘

追思可樂是丁
力草草言食眠頭觸屏風祗燈後慈
親笑勸掩陳絳

寄張子仲思

一思交好
是橋吳山
迷怕說萬山天樣遠房
陵更在萬

四月望再遊西湖

春光陸續委東流看
到湖邊安石欄更與蘇堤
濕鷺約辦

舟來賞牡丹秋
俗目芙蓉秋牡丹

吟詩自笑

文字光騰萬丈長錦官老杜豫章黃投荒忍死經人鮓討
飯充腸上岳陽
南昌詩云我雖窮至骨猶勝杜陵老憶昔飯從人討

雲集詩鈔

卅一

沈遼字睿達以兄邁任入官為審官西院主簿出監明
 州市舶司遷太常奏禮郎改杭州軍資庫榷華亭縣事
 奪官徙永州元豐八年二月卒於池州遼畜聲伎几研
 間陶瓦金銅物皆數閱數百年遠者溢出周秦王介甫
 贈以詩云風流謝安石瀟洒陶淵明其子雱亦有詩云
 前日覽佳作淵明知不及徙秋浦築室齊山名之曰
 雲集一洗年少之習從事禪悅蘇子瞻嘗語人曰睿達
 末路蹭蹬使人耿耿求此才韻豈易得哉余閱其詩間
 出入俗調佳者亦生硬排弄不知何以諸公見賞之如
 是也悉為汰去庶諸公不為失言耳

寄陸九

雲集詩鈔

賀老湖邊春水生野陽浮動北風輕天邊重關歌筦響鑑
裏絲舟金翠明大抵盛時須着意要知吾輩未忘情君如
彥道能懷帽便逐輕帆作此行

寄才仲

陶令在彭澤放懷天壤間橫江三百里往往向廬山多尋
簡寂醉時訪遠公閑不復顧吏迹世人指爲頑公子負文
華少年成青綸風流不屑俗爲邑得星灣節節香爐峰據
案見蒼顏何勞事舟楫緩步可躋攀形骸付物外勿使人
事關巖壑高世人有誰偕往還新篇定盈軸佳句不可刪
南風儻垂寄誠足慰衰孱

贈礪翁龍尾硯

龍尾山盤八十里龍尾有潭下無底秋月亭亭潭氣黑其
中有石色如墨山川秀氣散不爲風雲頑不爲砂礫融結
至寶有物主水上經營無處所經年始獲不敢賈我昔游
江南有客遺我誇龍子吾知龍能變化是或不可制追琢
爲巨硯大筆揮離騷中圓體天形外方作地象精光熠熠
角生浪熟視乃有紺羅文瑩潤無與比玩愛何可論我今
樗散無所事特贈華陽鴻筆麗藻人吾聞蜀都多學士眞
諸文府爲戰具君如窮經遂絕筆請與大軸傳後嗣

春日行

宮梅撲地白氈班細柳結煙金縷繁春華年年來不已人
生七十半衰殘少時豪放猶不敵何況羈棲落荆蠻囊中
琵琶金鳳閑古曲情深屬誰彈病目矇矓對荒山東風有
意爲掩關棄置萬事一夢還江湖水生愁夜寒

甲辰年五月十五日夜豐陽觀月

少年悵不樂明月何爲哉揚眉一遐賞寂寂更傷懷念昔
吾州樂泛舟湖上來佳賓適所好歡計成金鑿妖歌有送
響度曲清且哀留連夕陽下夜色起山隈光明水晶域素
衫中天開龍香弄微風四顧絕纖埃澄波照上下倒影出
瑤臺紅燭漸向微始知夜漏催美人屢更衣含笑玉山墮
歡樂殊未央鼓柁中洲迴人生無憂患遇樂且銜杯悵余
失交臂萬里來天涯羈愁那無感情慮長如灰神遊忽自
笑安知顧形骸

贈大中鎮國長老

昔從東南來稅駕依金地迎風步峻閣始眺豐陽市蒼茫
煙霧下一水縈如袂落難連峰精廬遙相峙宅土信巖

客社門忽彌歲風雲一蕭散身世兩無累懷歸悵有感史
遷念留滯引脰企昔游野馬埋蒼翠何時籃輿去復將老
師住請掃崑下石爲述空王偈

遊瑞崑

已恨初年不學僊老來何處更參禪西風搖落歲事晚卧
對高巖看落泉

寄四明神智師

甬水樓頭看盡山南城寺裏扣禪關老師多事猶相記千
里馳書慰病孱

次韻酬明發華宗

長卿倦游欲東還幸與諸公俱出關世事轉頭都委夢人
生何計得長閒殘花爛熳飄村塢細雨廉纖隔碭山誰寫

熙寧十才子老夫亦入畫圖間

出有正元十才子出關圖至今多有傳本

奉陪穎叔賦欽院牡丹

昔年曾到洛城中玉椀金盤淺淺紅行上荆溪溪畔寺愧將白髮對東風

龜茲舞

龜茲舞龜茲舞始自漢時入樂府世上誰傳此樂名不知此樂猶傳否黃扉朱郎畫無事美人親尋教坊譜衣冠盡得畫圖看樂器多因西域取紅綠結綉坐後部長笛短簫形製古雞婁指鼓舊所識饒貝流蘇分白羽玉顏二女高髻花孔雀羅衫金畫縷紅靴玉帶踏筵出初驚翔鸞下玄圃中有一人奏羯鼓頭如山兮手如雨其間曲調雜晉楚歌詞至今傳晉語須臾曲罷立前廡歎息平生未嘗睹清

都閨苑昔有夢寂寞如今在何所我家家住江海涯上國樂事殊未知玉顏邀我索題詩它時有夢與誰期

寄文翁

白兔觀邊僊路長華林修竹到南莊比鄰雞犬易過屋適意琴書動滿牀目斷鶺鴒分漢節心隨鴻雁極天潢欲移畫舸遙相訪正恐田家五月忙

奉酬舜文即次原韻

生無庸如斷絡已分老死填溝壑不能掉舌強附會何暇論經更穿鑿萊蕪醜欲生塵玉川婢僮亦赤脚世間要途不易驟身外名韉誰可縛本無道義輕一刃小下悲傷念流落水鄉夏半不厭熱繞舍新篁尚含箨訟庭勾釘非吾事吏按煩苛都可却農民漸使安剛畝和氣終須蠲

疹癩子羽不肖過我室懸榻何妨卧西閣年來多病亦廢
飲墻下度泥委杯酌舊學迂疎不適時譬如石田何可獲
欲捕大鵬逐方嶠終不勞心事弋繳行當掃鳥峰下試
煉金鼎長生藥

題楊師壁

年來病勑厭尋山且寄清冷白水間最愛楊師舊茅舍頻
來借榻伴高閑

寄慶復允中

木葉飄蕭已半殷試臨高處望君山野田繚繞來時路畫
舸道遙數日間坐想故人應見億如今禿髮不勝斑兩州
相望無千里莫惜新篇斷往還

贈清道

少年好書老彌篤牙籤錦囊數百軸江左墨妙世不矚有
唐諸公粗可錄諸公草法無可稱中葉始有張顛名張顛
亦筆有神會其妙不似點畫成後來沙門有藏真措意瀟
灑尤更精當時二子最名盛至今學者皆伏膺本朝蘇公
名弟兄汝南蒲陽亦有聲比來諸公已老死其餘卑俗類
可憎我昔乘興遊都城列子示我新素屏始知無擇得此
道長沙道人今復生歸來窮巷撿柴荆惠然相訪得忘形
贈我數行豈無意勢如九河注滄溟中間龍蜃降沒升歎
伏不暇獨可驚自欲何能謝言情欲贈金玉還愧輕慙勤
之揖喜不勝使我區霧老後明

池陽

池南柳色未全黃池北萱芽尚帶霜老去壽春不嫌早春

深留與少年郎
寒煙寂寂鍊青谿圓月亭亭上曲堤小杜風情遙可想閑
調絲竹舞金泥

林平

河邊柳眼澹煙浮臘破春歸一歲休不復昔時羈旅恨離
明還泊北城頭

次韻和宋平

憶昔銜杯折梅處孤山寺前千丈塘橫遮青林鬪殘雪暗
入紅袖留清香往遊都城雖屢賞縱有素艷終殊芳莫辭
遶林行百匝更嚼嫩蘂薰愁腸

和張寶臣卽元韻

始余倦遊念還家一身泛然寄天涯頭上白髮日益加朱
顏不駐爐中砂飄飄逸氣凌紫霞猶着黃綬趨泥沙烈日
謾憑烏帽遮窮巷歸來夕煙斜閉門正欲謝喧譁何憚屋
室多痺窳楊柳欲落鳴飢鷄八月秋風想乘槎市中有金
誰攫拏自欲歸耕老菑畬嗜好已背梨與楂那復開口增
訥訥眼昏白晝生黑花老悲獨向兒女夸枯轍不能活鱗
魴騏驥垂耳伏鹽車一官欣得飽魚蝦頓首致謁辭當衙
愚拙不遇何復嗟川陸舊遊殊不遐才渡楊子已聞哇吳
女蓬鬢多鬢髮西湖信美謝若耶松竹夾道繁根芽勢利
屈曲如盤蝸衛青變化乃龍蛇溪閨召客舞雙鬢撫手相
勸競呀呀西崦老師自煮茶太守陳樂奏淪巴湖水洗面
去塵痂故山白怕留文沙田裏小兒放猪猡爲樂往往鳴
簫笛亦有狐兔怛怛置令人指手徒爲柳賤職馳使告及

瓜聿來甬東絕紛華箝口不復露頰牙聯曹相係瓊與葭
上官庇覆不汝瑕優游重見林中葩四時風露換物華新
詩迭致思無邪吾子俊拔誠可嘉豈獨鄙言數矜誇高吟
大字耀紙麻時雖未亨道不汗屢出珠玉能愧奢麻姑手
爪幸見爬長篇垂况理不差正如牙戟相鏖叉

走筆奉酬正夫卽次元韻

樂府古有行路難但悲白髮憐朱顏時命多向賢才怪詰
屈不平萬世間壯心欲馳步輒跼試出鋒穎官已瘵中心
忽忽倦且煩不如歸去江海間要懸大刀數撫鑲何陋九
與八蠻自顧鄙性疎且頑誰能隨時事點姦從來多病
筋力孱正當落魄卧深山敝廬數椽粗可跼安居里巷鍵
重關終日無人踐茆菅冠帶不修衣袂黧高歌一曲舞雲
鬢比鄰有酒時見頌春風秋月與我閒夜靜佩玉鳴珊珊
高人逸士或往還蓬舟自訪來前彎行歌紅藥與香蘭已
增俗物近塵寰一身蕭然念早鰥髭鬚憔悴半已斑誰能
更問禿與鬻且聽溪水聲潺潺強來爲吏腰少彎幸讀君
詩錦繡篇相望鬱鬱何可刪君豈久居五兩綸

次韻酬李正甫對雪

苦寒冽冽日夜增朔風軒軒勢相凌遙山頑碧空峻嶒高
堂閑坐擁敝繒欲醺一杯意已仍結歌黃竹但伏膺愁雲
漫漫方四騰海氣上薄初不勝雪霰雜下風作稜漸著弱
柳頭鬚鬢半積軒砌發幽層枯樹兀兀愁飢鷹紛然不已
失溝塍一飲一斗心易矜試步薄冰猶戰競圓圭方壁降
復登憶昔前年正嚴凝攝事大蜡清晨興平生看雪實未

曾健僕駿馬半醉乘或前或後望交朋不辨明河與玉澗
烈火萬炬氣不蒸被面唯有凍與冰歸來心目如水澄喜
看道傍剝作燈豐年爲瑞古有稱凍死何暇談鄒滕欲邀
君飲恨不能相酬莫問準與繩

詒隱者

訪我維摩室不值香積飯開囊出黃粟爲汝林中爨軟語
少稽留青蔬亦易辦勿言方外趣我汝真如幻

樂神

夷人事神正自醜山頭水邊與神樂大巫龐衣手搖鐸羣
兒伐鼓更鳴角青山歷歷神欲歸湘水瀰瀰日脚西小大
酣歌向山棲神羹滿盎均汝釐

日落

日落沙頭山已昏飢鳥投暝下前村誰云野客無多事步
出林間自揜門

棗花寒

山禽哺鷄半欲搏坐想葛帔臨風湍數日陰霖復未暢不
知更作棗花寒

復作過商翁墓

當年不佩封侯印後世誰尋墮淚碑定遠將軍豈夸勇關
南常侍最能詩故人不解傳遺事五嶺猶能識信旗墓下
寂寥無鼓角秋風獨向白楊悲

蒼頭已作歸來曲不信全生庾氏碑疑有史官爭立傳終
無嗣子與聞詩後房已閉千金妓私廟空收五采旗聞說
詔書優贈典孤魂應結九泉悲

鈷母潭

余讀子厚書始聞鈷母潭榜舟西江下振步愚溪南高下
凌山阿松篁蔽秋嵐土人識其地古木森榎楠水深日波
瀾此理亦易探古木為鈷姆土音正相參所記或不然信
書殊未甘此公廢已久山水窮年孰造化毫楮間浮實微
相銖幽心有默識西歸助清談

贈廣祐上人

不入四明路侵尋已十年葛藤論往事蟬蛻想蒼煙松下
數株石巖前千丈泉何為不宿住芒屨更參禪

奉簡莘叟

紅葉飄蕭秋後山相望止在一嶼間老夫無用方安命夫
子何為早閉關世事不隨歌吹樂此身畧與水雲閒經年
不見寧相外安在區區事往還

火星巖

火星巖下石峻增殿閣相望止一僧莫問人間興廢事門
前流水几前燈

疾難

江流激激過疾難更上山頭看打盤百歲老人親擊鼓城
中憂樂不相干

踏盤曲

湘水東西踏盤去青煙白霧將軍樹社中飲酒不要錢樂
神打起長罾鼓女兒帶環着縵布歡笑捉郎神作主明年
二月近社時載酒牽牛看父母

過商翁墓

征南名地蚤相知老向瀟湘看立碑
江節獨馳南嶠事古風不括故山詩
愁煙半鍊黃茅壠部曲誰尋舊將旗
遙矚蕪江想靈氣孤雲落日不勝悲

湘中宿臺步寺

湘源初甚微屢挹不滿缸比至臺步
虛泛泛爲長江虛頭市初集魚豆皆
成椿夷獠不識人笑鬻菹與麗綠荷
竭苞苴人散誰復撞鷗鳥亦來下酒
旆停空杠我來憩桑門竹戶映蓬窓
夜寢那可寐江流正淙淙

泛舟上湘口館

瀟水漫南來湘川趣東下二水始相
會清豪不相藉山廻石瀨出水老脩
煙嫁泛泛白蘋洲林風媚如西宿昔
感騷憤幽興遙相借不謂垂老年羈
孤窮山舍潮來刺舟去孤月臨清夜
安得勝鯨魚不復入間化

禪僧巖

瀟湘山水窮欲徧最後乃得禪僧巖
禪僧成道久已化獨有崖嶿青巉
巉降身入洞不甚險突兀三室誰彫
劉東西有道若蛇竇白雲幕幕門無
緘持火旁行不知際七穿八竅遙相
銜涓涓乳泉白如雪由來此地殊仙
凡主人引我復深入行指嶼穴尤嵌
崑中間石鼓有異響擊拊想可參韶
咸吾身久病苦下溼復良神怪來邀
櫂直趣出洞上南巘豁若巨海張雲
帆山花爛斑出竹補亦有禽鳥聲誦
誦欲還未可復小駐日脚已過東岡
杉

贈別子瞻

平生雅游眉陽客五年不見鬚已白
借田東坡在江北芟

夷蓬蒿自種麥相逢不盡一樽酒故態那復論歡戚手抱
阿武勸餘瀝維摩老夫失定力老夫寂寂出三湘更欲卜
居池水陽薄田止須數十畝田上更樹麻與桑老來正苦
迫生事清明雖近猶可秧罷亞若可博乾麩以無易有遙
相望我舟卽行不可駐欲卜後會誠茫茫他時有信若可
寄不用辛苦爲詩章

德相送荆公三詩用元韻戲爲之

幽居卧山間不與世相接餘生委蒲柳滯想遺空劫德相
蚤相親顧我情未厭數枉南堤步更引青谿艤相見亦何
事坐對羣峰疊陽春始萌動煙嵐生劍鋏廉纖數日雨萬
里浮塵浥赤白未殘花修穠半敷葉行招老僧語遙矚東
田饑窮崖歷可造峻流誰敢涉衰齡易生倦幽巖就調爨

德相知我憊雙眸困垂睫高詠楚公作欲引維摩筵初聞
未甚解靜聽疑可獵有如太華峰跛躄豈易躡不知泛滄
海何力施舟楫遙窺土山勝昔乃文靖業二公雖異時名
德遠相躡山川若有待風物增悲懔未知蔡侯履孰與支
郎躒勝游可槩見筆力方峩業更紆別後情琅琅鋪簡牒
倡高必和寡排比安且帖簫箏合古律宮羽自諧協世人
所欽慕有口空嚅囁東牀坦腹士左右參經笈爲賦奕碁
句璆琳吐胷脇鏘然不可閉由來知捷捷謂如伯升勇揚
兵開宛葉豈比文信君無謀喪張靨致死在必勝甘言方
示怯尾章示戒訓足以傳芳謀後生知自勵何必捶楚挾
正如嚼冰雪清冷快牙頰我昔造公室公方任調燮辱枉
淵明贈今猶秘巾篋當時隙官去終身欣廢跼冠帶遂已

捐頭腦深埋屨肯羨冥冥鴻安知栩栩蝶心清久無夢神
固安知麗少小銳文史老大心更懾是古豈余心非今寧
我愜况復論翰墨爾來那可輒不識渾脫舞何愧張顛帖
所居養鸞雁菰蒲觀唼喋亦有藜藿畦粗充七與挾孰知
名可貴安用祿爲糴無求豈有沮不動誰能增汝堅百萬
衆淮濱空雉堞陵陽丈五墳朱雲本輕俠百年竟何往終
當封馬鬣何必悵霜毛更向窓前鑷

德相所示論書聊復戲酬

野舍老餘生雅尚今已愜不逃世憂患餘事寄巾蹠行尋
青山轉坐對青山疊欲隨白雲去儻與幽人接盤桓太清
洞悵望長江艤昔時古錦囊今還白羽箠不復叔夜燬真
得孫登攝九華一枯藜青溪一孤楫得喪苟自達死生安

足慄朱顏久不駐白髮何爲鑷羣物自流轉吾生寄天燮
德相屢相過老夫寧足躡由來廢井水不如長劔缺往往
論書法軒軒兩目睫中郎石經在元常表軍捷漢魏多傳
人至宋有遺帖唐室初最盛漸衰自中葉歐虞緬誰嗣顏
柳何足蹤篆籀昔難工草聖誰敢輒巨山作散隸雄古掀
龍鬣貞觀喜飛白凌厲騰春蝶豈特豁神觀直可祛鬼魘
古人有所寓天性難必協所志有小大其材有勇怯或憚
懦文雅或軒昂豪俠或轉戰鞍馬或驅馳弋獵或發於止
諫或得於訟牒或奮奪牀陛或造成械摺或爲神所追或
自勢所劫或醉以賈禍或許以行謀或習於娛樂或勞於
呿嗜有燦如文錦有勁如金柅有倚如戈鋒有點如山業
有駛或如波有媚或如靨或騰如煙霏或落如鳥跼淵妙

欲飛動拙惡愧偏摩當寢或不寐當晝亦忘饑有譽終甚
微或毀則羣躡爲功有不至考古安能厭十年幸能就萬
金毫豈過金玉敷卷軸龍蛇閱箱笈是惟小夫技寧當丈
夫業譬如論唐虞何曾道郇葉如君負高識於此何足挾
一戰雖未霸遐心豈卽怙朝廷方洽熙四 皆遠懾坐復
洮河地直擣幽燕脅朝夕奏奇功羣儒爭鼓篋太平任文
治 血何煩喋道德以爲宇威武以爲堞豈比叔孫生雜
用隨何頰吾衰何可道不死同原涉

德相惠新茶復次前韻奉謝

暑雨閹窮山道滑不可躡隱几念投老葛衣坐搖箠林端
使者至乃得德相帖佳惠致新茗遠來自閩笈吾聞北苑
勝不與羣山接山下幾千家以此爲生業新陽一日至東

風方獵獵百草尚勾甲靈芽已先捷所採僅毛髮厥工巧
烹燮甘泉列益釜熾炭浩旁登修竹爲之規黃金爲之挾
形摹各臻妙製作易妥帖至尊所虛佇守臣方惕懾其上
爲虬龍蜿蜒奮鱗鬣稍降乃交鳳文翼相盤跼而封趣北
道驛使互防挾四方老金玉擬議誰敢輒屹屹健士檐飄
飄迅溪蝶穀雨不及潤權門已盈篋帶鞞體正方葵華角
仍摩始傳盛王鄭後來止游葉大爲權勢迫小或盜賊劫
其間起鬪奪亦數冒刑榴南夷出重購不憚浮海楫北
比尤好喜笑開 曉豈不產 蜀豈不生楚葉厥品乃大
戾固難一理攝朱門厭酒肉辯士厲舌頰儒生備夜誦農
夫困朝饑禪翁過江煮老獲空 腹喋綺席夢騰騰玉山頭
業業無魚乃尚可非此意不厭 一泛舌已潤載啜心更慙

不唯豁神觀亦足暢煩襟清冷生肺肝爽快勝抓鑷孰不恃惹茲伏波煩謗囁孰不飲醇耐伯仁憂腐脅祖逖敦雅尚鴻漸未博涉君謨號精鑒才翁亦相躡玉川七椀典令人解頤厲奇章兩串賜遺芳在圖謀余昔喜賓客爲世困書牒輕重必酬酢往來煩躑躅自從竄裔所藏多敗滬亦幸衰老年數病脾氣怯棄置在高閣魂夢昏多魘拘病出湘漢餘生若蟬蝶希夷有幽卧刀劍銷銼缺一榻就空曠百骸得和協久已廢翰墨况復道游俠有味養元和無物累吾嗜臨風欲占謝遙企山西傑

初創二山

左山叢古木縈帶多美竹右山少平地矧礧斷蒼玉於此豈無竹蕭疎倚崑谷上參九頂迥俯浸清谿澳於彼豈無

石嵌崖大如屋景業讀書處基構有遺躅始吾購二山何爲不相屬中間古蘭若臺觀當山腹崑洞九十七龍蛇所潛伏昔人作軒榭高深奇秋麓我乃築西崦手自親鉏斫青溪漫無際島嶼相重復雨餘山更佳春流漲平峪下欄池陽市修煙弄芬馥大江天上來淮山點眉綠老夫豈無意落日傲鴻鵠東嶺亦誅茆菴粗容足六峰引南睇九華勢相續白雲與誰期千載媚平陸清曠無俗韻脩明資遠目去秋已種麥今春復栽粟野老豈余欺東坡幸膏沐二山誰與適最與枯藤熟相覓誰無人顧我真麋鹿一年一瞬事何暇知委曲得此化餘年不問君平卜

初泊磁湖

時子瞻在齊安

歸舟不解洞庭帆舟上騷人雪滿簪小駐武昌江北岸春

風今夜泊江南

清泠臺

山前繚繞白雲飛山下溪流那復迴不向此間休歇去寧將白髮汗塵埃

左史洞

在北山

萬古齊山石誰開左史洞左史今何在蒼崖本不動履險下重巖幽深鬼神總石門絕世路久爲塵泥擁青天十畝地嶮岈如覆瓮琬琰鑿屋壁煙霞列梁棟崖間不死藥必非近時種人去境長在境與人爲重欲觀晴昔意幽禽發清吟吾方寄淵寂無礙亦無縱手自翦荆棘結茆當石空長與麋鹿遊不復人間夢

送曾處善赴寶應尉

我初隱身治蓬蒿餘生不復人間世左山右山白雲上一動一靜浮塵外齊山山上老夫庵青谿谿南侍中第朱顏公子不易識短衣款段來相際長堤相望雖甚遠有意卽行終不計東鄰竹閣長夏熱我構雲巢方自蔽爛斑石臺始一眺寂靜庵基猶未薙隨雲步訪胡矮老放懷止得殊師利石橋寺前夜月冷金雞峰下秋霖霽君恃馬足不憚遠我駕藍輿隨處稅六峰老師氣軒豁九華雌山苦陰晦庵前菜茹常不厭城裏羊肩難數置漫天風雪一暢目滿榻奉陽欣炙背襄休自參黃檗禪院福豈是一昌尉相見終年已解空分襟一別那成滯拍江春水浮鷁首萬里青天運鵬翅順風莫寄南來書老夫柴門多自閉

臺下

石梅落落欲黃時
細雨濛濛暗不開
數日不行臺下路
不知江水過山來

清冷臺初夏一首寄上翟舅

清冷竹樹暗成陰
漸有溪流過此岑
草草作巢方寄老
情情設榻本無心
松門不隔紅塵路
月疊初無俗物侵
欲向人間訪消息
渭陽應有遠遊吟

齊山偶題二首

杜子風情春水波
至今詩句使人夸
不知朽骨猶存否
山上年年黃菊花
朝雲未散白荷波
落日已過銅陵西
不向人間生皓髮
直尋仙客上青谿

西溪集鈔

沈邁字文通錢塘人以郊齋郎舉進士廷唱第一謂其

已官改第二通判江寧府除集賢校理知制誥出知越

杭二州遷龍圖閣直學士知開封府拜翰林學士丁母

憂卒於墓廬有西溪集十卷詩非其能事而唱和者為

王介甫蘇子美何故而止於是也

七言送僧息齋歸吳

西風送霜河水落
東都歸客不可留
囊衣卷詩載輕舸
飄然獨下東南州
吳山木落衆峰出
越湖潦散孤嶼浮
橘丹尊紫新薦俎
若下醪美不計售
十年塵埃一日去
猿初脫檻鷹下
講幽潛遠颺
官回首送之却
顧令人愁鱸魚正肥
張翰老田園將蕪
陶潛憂子歸應有
問予者為解區區茲

有由

五言天台山送僧象微歸山

吾聞天台久嘗讀興公賦茲爲東南鎮神靈之所據奇挺
究萬狀嵩岱不足語頗疑說過夸特爲辭之媿象微迺州
民能識山之故從容試爲問聊得一二疏赤城建霞標上
與斗牛附萬有八千丈轟若天一柱瀑布發高源飛流翻
四注雪霜浮虛空晦明亂朝暮巖足多丹石光華燦寶璐
稽溪百餘仞欲濟毛骨怖九折凌峻梁五界窮幽路芝蘭
散奇艸松桂羅嘉樹祥風吹白雲飄然若可御幽閔足瓌
怪纖悉難畢具凡迹古不到神物陰自護傳聞昔人說中
有洞天處是名不死墟衆真所游聚玉堂敞金庭碧林列
璠圃有能從而求得之迺仙去斯言寧可信良非吾所慕

吾志本丘壑久已失厥趣誰言石渠客乃甚轍中鮪秋風
日已高歸心浩欲驚茲山宿所愛送爾緬東顧吾廬因爾
卜侔來審繪素

七言景德寺考試院壁和王介甫所題詩

石藍開盡紅着地瓜蔓半枯黃倒垂坐看一夜芳意歇風
霜卽是蚤寒時

五言蓬萊山送徐仲微赴蓬萊令

渤海三神山蓬萊隱嗟峨仙人桂葉舟浮矣明月波驚塵
不可到飛鳥不能過世人但傳聞欲往爲奈何胡然古荒
王甘心事欺訛於今禱祠迹往往存山阿當時燕齊間方
士肩相摩遺俗頗淪胥官不嚴禁訶子去爲邑尹施舍各
有科茲實繫教化無宜反媿媿平生學詩書仁術嘗切差

毋曰百里小民人豈不多誰當之武城敢復聞絃歌

七言和君倚景靈行

東城大道何逶迤中直清廟表六扉右臨景靈秘館之翼
翼衣帶相國浮圖之巍巍道旁他舍多絕赫車無停輪馬
交策風塵勃鬱千丈高素衣化緇雙眦塞南阡窮巷我所
居上下省戶兩歲餘病軀羸乘實厭畏每趨徑路宮城隅
宮墻倚空背環極隱嶙樓臺露金碧朝霞夕照天半明墻
下行人徒眩惑我嘗入謁得縱觀威容物采嚴且完鸞車
歲歲躬獻享孝思盼蠶通神歡重門設衛日常闔靈境那
令世人雜但見長松怪石列若屏突兀陰森兩遮匝我家
東南滄海涯乘時偶來觀德輝歸飛故隱自有期何必於
此空歎歎

七言和吳仲庶延菴閣後牡丹花

時後殿考進士

承明待詔盡名儒一願當君奏六符獨笑開元供奉客惟
將歌句奉歡娛

南漪堂

山遶湖堂寺遶山平生願向此中閑青雲白水相浮蕩野
客高僧獨往還年少無嫌軒冕累因循將恐鬢髮斑南漪
最是逍遙地且挹清波濯愧顏

次韻和少述秋興

浩蕩西風動客裾飄然歸息滿田廬少時豈省為名誤老
去真知與世疎勝事祇隨詩句盡壯懷猶向酒杯舒南山
已有來年約三徑何年得自除

次韻和李審言上元寄王巖夫

此都豪麗歲仍豐此夕都人凱樂中車馬笙簫千里至樓
臺燈火九衢通香輿輒輒凌風駛粉袂翩翩照地紅病守
行春真勉強更堪攀倚少年叢

次韻和王巖夫見寄

前日移舟就近村送君西望大梁門九重宮闕天光遠千
里江湖水氣昏壯士遨遊應自適少年離別枉傷魂北州
為政須當厲卽上青雲款帝關

次韻和孫少述潤州望海樓

北固峩峩鐵甕完京口浩浩海門連鵬搏羊角來天外鰲
戴方壺獻几前西府旌旗猶壯曙南朝宮殿盡蒼煙登臨
不用成悲感自得開懷一曠然

和少述春日

風流自古吳王國一一湖山盡勝遊上巳清明最佳節萬
家臨禊錦維舟

初晴池閣暖無塵花落絲飛不避人祇愛年年好光景須
知華髮一番新

卧病江東又見春高齋長日坐生塵看花飲酒應難強猶
有詩情謝故人

將至京口先寄孫少述并呈晏子俞

為郡無閒困米鹽先生有道獨幽潛豫章因甚尊徐孺益
部何能詆蜀嚴已脫簿書身自放肆尋山水意寧厭京江
最欲方洋處願從屏星卷西檐

奉酬潤州余少卿見寄

兩鎮旌旗對撫邦老成循政獨難雙賜環已許歸西省擁

西漢集金 四
檝方來絕大江後乘願陪幽賞盡詩新頓使勇心降主人
意厚春潮小且卷孤帆偃畫杠

戲盧中甫錢才翁

晴日春風花氣浮少年嬉逐滿揚州誰憐居士身常病獨
坐空船理白頭居士身常病一作終歲借借病

和中甫新開湖

渺渺清波百里浮昔遊曾是一扁舟十年人事都如夢猶
識湖邊舊客郵

遇冀州聞介甫送使當相遇繼得移文以故事請

避諸路又以詩見寄次韻和答

風沙散盡舊狐裘走馬歸來過冀州聞報故人當邂逅便
臨近節為遲留不容傾蓋論時事空寄新詩寫客愁却望
後車塵已合蕭聲清斷去如流

還家自戲

憶昨邊城初見春纖纖垂柳正矜新不知遠客貪歸意欲
把狂絲繫画輪

依韻和李審言見贈叙舊

日與公家三世舊坐看高閣壓亭衢榭枿屢構明堂厦麟
鳳更參聖代符結友固應皆以義論詩何獨取於愚歸舟
早晚乘潮度猶得西湖一笑無

依韻和施正臣遊聖果寺

盤崖絕巘與天通汗漫煙霞謝世籠聳起浮圖山突兀自
然衙石玉青葱古人興廢千年上遊客登臨一嘯中誰為
燕然愧班竇孤城羈據亦銘功排衙石有錢鏐刻詩

西溪集金 五
贈郊縣桃源宮王道士

我昔剡谿遊道人亦相遇重來十歲餘顏色宛如故顧我
病衰早鬚毛已蒼然乃知世上榮詎若山中閑道家東
都問胡不歸北北方多風塵素衣化爲黑斯言吾所信吾
志亦江湖瀟洒會稽守平生欣莫如君恩容苟安願奉三
年計幸爾數到城間談北方事

次韻和不疑借書鄰幾遇其寢

嗟我江湖人野性實疎簡况從衰病侵事事益以懶豈不
思自強所息乃有限但愛江夫子平生事高散維於讀書
勤晝夜不去眼每勞從事賢獨使簿書縮揮署曾不勞兼
人信無赧有時倦欲休就席初不煖鄰友更借書丁丁叩
門版尤厭吏舍喧牛羊闌棚棧不如歸吾廬靜對日晚晚
詩成還示我足以驚幽孱

龜谿集鈔

世三

沈與求字必先湖州德清人登政和五年進士累遷至
明州通判召對除監察御史歷兵部員外郎殿中侍御
史請都建康上不悅出知台州召還再除御史遷御史
中丞前後幾四百奏其言切直自敵已已下有不能堪
者高宗時有所訓勅每日汝不識沈中丞耶移吏部尚
書出知潭州召除參知政事出知明州遷知樞密院事
卒謚忠敏其詩喜論體製格律源流所自不貴苟狎有
龜谿集十二卷

次韻曾守懷玲瓏山

泉石有膏肓料理費和緩風埃客子遊夢想畧相半端如
麀羊酪投匕念鄉饌懷哉小玲瓏舊賞記酣宴玉女下雲

總輕我年未冠誅茆老三間此意已懸斷少須草堂資兩
足那可絆謝公愛東山自結尋幽伴詩筒忽相先紙價豈
容賤流傳從使君感此歸息亂擷蘭躡危根漱石俯長礪
野性等麋鹿百嗜寧食薦攬衣中夜與測漏疾流眇局步
愧鴛筋早飛傷短翰正使展齒折未救斧柯爛時節脫復
徂遲莫空浩歎何當脂下澤去路鬱交貫

錢塘賦水母

疾風吹雨回江城鱗牙嘔啞潮欲平客居喜無人事櫻相
與環坐臨前楹眼中水怪狀莫名出沒沙觜如浮罌復如
緇笠絕兩纓渾沌七竅俱未形塊然背負羣鰕行嗟其巧
以怪自呈疑目矍視相將迎老漁旁睨笑發聲曰此水母
官何驚江流如奔絕滄瀛潮汝往來月爲程藏納衆汚無

滿盈浮埃沉滓溷九清結成此物宜昏盲使鰕導迷作雙
睛乃能接迹蚌與蛭亦猶巨蚤二體并離則無目爲光精
江天八月霜葉鳴罍師得鰕供水征水母弃擲羅縱橫試
令收拾輸庖丁絳礬收涎體紆縈飛刀鏤切武火烹花羹
釘餽粲白英不殊冰盤堆水晶稻醯齏寒芼香橙入齒已
復能解醒遣漁止矣勿復評嗟哉此性愚不更定矜故態
招三彭且摩枵腹甘蒸羹

泛舟村落阻風不能少進而菱梢芡背綠舩上下篙
人病之

艇子掠岸行水瘦不濡尾狂飈振疎蓬獵獵鳴兩耳十篙
八九褪逆勢何乃爾野芡伺吾間回梢哆利背亦有芡浮
角一一肆輕鄙初欲事幽尋解纜出疎葦乘流覓清淺濯

纓助深喜事有大不然移項未離咫尺安得望蓬萊巨艦破
潮起征帆駕長風一日三萬里

夜坐感事

沉沉夜氣歸虛堂閉深寂孤燈地餘花寒雷韻殘滴醞釀
萬斛愁感慨一人敵何當棄短檠陰山叱鳴鏑

戊申初寒偶作

去年十月冬猶溫單衣曉出錢塘門攜拳僅脫餓虎口更
吟楚些招驚魂兒女爭從亂離苦咿啞遶膝多語言舟行
畏塗侵夜泊孤燈明滅何處村蕭蕭細雨疎葦響風力漸
搖枯柳根失聲號寒泣龍具促懼傍險爭前奔還家依然
四壁立故衾敗絮那忍論無衣豈暇具裘褐海圖坼裂波
濤翻天公戲人亦太虐雪花徑尺連上元今年十月事羈

官兩脚如舊身大存紙窻寂歷風竹嘯古木中夜號空園
旅人不眠毛骨冷撫事念往多煩寃吾儕小人不論數豺
狼滿目哀王孫似聞易水寒墮指北望大漠煙雲昏安得
壯士馭八駿沙蟲猿鶴俱騰騫歸歟莫如中土樂天子孝
友朝廷尊坐令鐵衣掃蟣蝨四海挾纊懷君恩

夜宿千秋嶺下田家

陰磔來悲風薄莫吹急雨冥冥攬寒色咫尺暗山路茅簷
雨三家曲澗縈竹塢停車遣問訊欲止此何許老翁行步
弱扶杖倚門戶問我官何忙野宿今無所向夜號狐狸深
林嘯豺虎甘心在擇肉闔首輒憑怒駕言往何之一榻翁
敢拒延我傍中堂慇懃慰良苦解衣土銜旁支枕憇行旅
昏然飽安眼境寂絕猜怖雞聲報明發征車犯寒去呼燈

別老翁鼻息方栩栩

維心方刊正三國史某以精筆遺之蒙餉大篇爲謝

氣格渾然三復感歎謾依元韻奉和蕪陋增愧

諸豪雄誇劔芒銛毛錐斂避收餘尖櫝間黠黠渴銅雀案
上爬沙枯玉蟾學堂山人有遺齋筆力大可千人兼掉頭
不肯書柿葉酒酣起舞怒奮髯十年歸坐溪口屋傲視冠
冕猶髡箱草玄草聖聊戲耳如醫識藥信手拈邇來直筆
到三國去取法度何森嚴眼中青白世矜異皮裏陽秋誰
顧瞻更憐中書今且老雞毛葦管爭出奩懸知入手便穉
劣那復助子窮幽潛我持妙頰急送似標題珍重存華籤
勢如執法貴心正俗病要以此語砥揮掃定見龍蛇走紬
繹何憚歲月淹須知筆意似人意柔順未必非凶險

清明日晚晴

正好園林藉落英細風吹雨濕清明牆陰旱渴休無賴自
有鳴鳩解喚晴

舟過荻塘

野航春入荻芽塘遠意相傳接渺茫落日一篙桃葉浪薰
風十里藕花香河回遽失青山曲菱老難容碧草芳村北
村南歌自荅懸知歲事到金穰

從劉殿院借書

骨寒宜伴列仙臞欲喜依劉計未疎自昔暗中人易記到
今名下士非虛欲從給事論奇字擬向中郎得異書願借
牙籤三萬軸爲公一一辨蟬魚

過徐氏莊居

只着南冠不着纓，掉頭防我問功名。數椽茆屋有時漏，一
塢野田無具耕。酒地定能容勝踐，墨畦終擬過平生。扣舷
歸去蒹葭闊，後夜相思看月明。

過徐氏郊居

林梢眇眇墮斜暉，剝啄還來扣隱扉。門巷劣容居士屨，塵
埃不到野人衣。恰當夜甌黃梁熟，盛供春山紫蕨肥。侍坐
無人只山川，兩翁相對自忘機。

次韻盧憲春意

少陵花惱便顛狂，天與多情付此郎。宿露園林鶯舌亂，暖
風庭院蜜蜂香。閒愁幾欲縈春事，幽怨還能入醉鄉。應斷
玉樓雙望眼，便須催促理歸櫓。

次韻宏父喜雨

黃壟初看卷麥禾，老農還復厭晴多。四郊岸尾別新漬，一
雨苗根長舊科。已發政聲歸召杜，更驚詩律鬪陰何。王孫
欲識田家樂，水亂溝塍涉可過。

行簡以曾守韻見貽復和一篇

續經無復補嘉禾，老去忘懷及見多。摘尾簿書寧問署，點
頭章句僅成科。求田下澤吾行且，招隱空山子謂何。行簡
晚故山歸
鍾林之句千萬買鄰真左計，一丘端約老相過。

曾宏父將往雪川見內相葉公以詩爲別次其韻以
自見

客裏息家且罷休，無聊懷抱不禁愁。時魚苦筍過百六，又
到一年春盡頭。

牆根啁啾百鳥鬧，最愛乳鳩來喚晴。日永春閑溪院落，憑

能便當管絃聲

揚舩送子下蒼雲繫纜沙頭多柳株十載風埃老行客不知鷗鳥記人無

前溪溪頭玉色魚羊酪豈可比鮮腴江黃會中有勝處健步走置煩長鬚

野店山茶亦可口試敲松火煮石泉相逢故人如問訊但道老去多煩煎

還憇湖光亭復次江元壽韻

羊酪尊羹本異區江湖隨俗語姪隅紫鱗撥刺衝文苻翠羽翩翩過綠蒲舫舳與饒青絡馬鈴箬自當紫微壺叢書校罷頻搔首天末孤帆去欲無

僕人自燕山來云有次律兄書被盜失去

投曉平安使倉皇扣倚廬修塗幸及此細語問何如云自三關道曾持一紙書崎嶇經寇難隻影到鄉間

杜季習遊恒山謁府帥劉公輒次劉彥常韻作詩送之

勇往都忘去路難曾吞螭虎氣桓桓吳頭楚尾三年夢塞北江南五月寒瘦馬繫門留我別明珠攜袖許誰看書生自有西江量何止能濡舌本乾

董采大有詩紀吳江豁然閣舊遊索僕繼和

湖陰舊雨記重來小閣深明傍水開蝶螭橫空橋倒影琉璃拍岸浪成堆勝遊君復羹魚婢幽屏子方飯芋魁遙想經行斷堤曲野花漂盡雪玫瑰

石壁寺山房卽事

望斷南岡遠水通客橋來往酒旗風畫橋依約垂楊外映帶殘霞一抹紅

石壁寺

山縈細路走修蛇峭壁連雲只蘚花木末忽看幡影亂馬頭初見殿陰斜迴廊迤迤穿危嶠側澗涓涓露淺沙秀色可餐吾事辦粥魚茶板莫相夸

秋日闕居

茆屋秋風斗破除蕭騷渾似浣溪居青山侍坐從吾好黃帽籠頭與俗疎賴有園官能送菜可無溪友解留魚從今輒莫慚枵腹一飽須煩插架書

野外罕人車

野外罕人事雖貧心自寬霜蔬供綠節社酒泛黃團日落歸牛近風微宿鳥安展書遮老眼燈火砌儒酸

次子虛韻

誰能延月倚危樓細履相將偶當游倦聽山歌懷舊俗閑看水戲濺寒流土人以水戲然燈燈光競作千門曉酒力微寬一掬愁明日八分疲阿買詩饒元只在清眸

次夕雨作用子虛韻奉懷次顏知魚軒小集

爽道繒山聳蜃樓小軒終憶數條游月將人意十分滿雨入溪光一派流靜聽屐聲喧夜市旋挑燈地醞春愁閉關不問陰晴事時怪亥花掠病眸

卽事

造物勞人亦惜哉又驅疲馬上崔嵬經從野店初嘗筍行盡江村始見梅千里短書先夢寐半生多難足風埃桔槔

俯仰成何事已念漁蓑歸去來

次吳江

小邑蕭條兵火餘狐狸入市自相呼
茹牆竹戶斜陽裏十室生涯久已無

允迪招行簡卜居鷓鴣谷僕意羨之作詩送行兼以自見

嚴陵灘下鷓鴣谷聞道元英舊隱廬
鼻祖名高詩格在耳孫才傑宦情疎
漫山松桂雁行立入鄖茆茨星散居知爲劉郎賦招隱莫教花落到通渠

子虛航重湖之險遠過山中輒次維心韻以謝

小窓眠蠹虎敗壁上蝸牛老樹陰垂合前山翠欲流
狂言連世用疆飯了身謀不謂輕千里能迂訪戴舟

次韻學士兄見一亭

塵土敗名如敗敵雲山招隱似招降
謾傾魯酒醒猶獨聊發吳謳調本雙
誰念佳人在空谷自同漁父老清江
宅年對榻分餘地風雨蕭蕭夜打窓

次律兄餉魚魚不至而詩至頗類南海使君送酒輒

成絕句

憑虛公子騎鯨後烏有先生控鯉初
可是凡魚亦仙去空餘一紙腹中書

劉希顏提舉見過出自卜山居二詩次其韻

偏仄風塵際分攜歲月賒向來聞避地
勝處偶爲家對客談鋒銳憂時酒量加
中觴莫辭醉回首又天涯

次韻呈維心拙澀不工當爲抵掌

粲粲疎梅短短牆
騷人長恨失遺芳
低徊草棘精神透
彷彿關山魂夢香
月淡乍看清影亂
春深終恐綠陰藏
歲寒爲爾添愁絕
倚樹微吟亦自傷

戲酬嘗草茶

慣看留客費瓜茶
政羨多藏不示夸
要使睡魔能偃草
肯慚權伯解迷花
一旗但覺烹殊品
雙鳳何須覓瑞芽
待摘家山供茗飲
與君盟約去騎奢

節孝詩鈔

卅四

徐積字仲車楚州山陽人少孤從安定學門下踰千人
獨以別室處之遣婢視飲食澣濯盛寒一衲裘以米飯
投漿甕中日食數塊而已事母至孝以父名石平生不
用石器遇石輒避母歿廬墓哀號三年如一日每以五
字教學者公卿部使者交薦除楚州教授改防禦推官
又特改宣德郎崇寧間又特除西京嵩山中嶽皆非常
制七十八卒于家謚節孝處士先是枕書卧冊間大書
曰五月榴花不肖開直待徐郎來筆蹤不類人世書卒
時適五月一日人皆異之詩文用腹藁嘗曰文字在胸
中未暇出者甚多也晚年耳疾不發遠書率以小詩報
之

和楊掾月蝕篇并序

楊子常掾爲月蝕篇示予辭義甚偉某不敢虛辱其貺
迺吟哦而和之詩曰彼月而蝕則維其常春秋月蝕不
書其非大變也可知矣形而爲詩歌若無不可者遂卒

賦之云爾

元豐之元歲戊午斗柄斜指西南維月行赤道日南陸營
丘分野星虛危昨夕旣望復今夕盛若不損盈不虧安知
變起在頃刻突如有物侵其肌其始色變甚倉黃須臾赤
黑相合離良久煙焰極薰燎一團白玉燒爲灰黃琮蒼璧
不可辨枯株死兔將安歸孰烏其吻吞巨皿孰丹其汗流
墨池如食非食始爲薄有物無物不可知蝦蟇何物敢張
口麒麟何故敢爭鬪是何星曜敢侵犯白是其形不可久

君不見對月數眉毛須臾引臂不見手嗟噓天上之神物
乃有如此事所蔽至甚不可解凶而家室亡而身不然借
使幸而免後世譏笑遭惡名君不見漢朝賈生文有餘其
心大勇其才疎當時如必用其術紛紛不免危其軀鼉鐸
堂堂蔽於刻公孫規規蔽於諛谷永之才蔽權勢有若鷹
犬供指呼霍光雖賢亦有蔽何不早去顯與馮子都劉歆
致位爲國師豈若楊雄久以爲大夫蔽於大高李膺輩蔽
於已甚陳蕃徒竇武不斷蔽可痛東之不忍蔽可吁王允
所蔽在無權荀彧所蔽不早圖蕭禹之蔽入於佞王衍之
蔽失之虛牛李雖奇蔽朋黨機雲雖俊蔽附趨王導蔽怨
殺周顛遂良蔽誣殺劉洎崔浩蔽強殺其身所蔽若此甚
可畏我愛安世真朴忠匿名遠世歸至公有私見求堅不

許以私求謝絕不通諸葛武侯爲將相心迹皎然無所枉
有罪至親而必誅有功雖讐而必賞謝安知晉王國寶不
以身蔽能辨早人心自是悅而服不顧四肢與肝腦符堅
之師號百萬一戰而北若權槁我吟此篇不足錄却憶唐
衢忠義哭古人今人何擇焉大抵人心蔽多慾月之所蔽
惟須臾須臾蔽去明如初人之所蔽何太甚至於終身不
悟不可除月乎月乎明哉明哉善去其蔽何速之如君子
法之所以改過賢者法之所以知非勇決之徒所以奮發
感槩之徒所以嗷歎我雖老且病齷齪無所爲猶能對月
吟歌詩安得慷慨之士如桓伊把笛爲予吹

大河上天章公顧子敦

萬物皆有性順其性爲大順之則無變反之則有害禹之
治河也浚川而掘地水行乎地中其性安而遂因地爲之
防猶恐不足制故附之山足使循山而行山不可必得或
原阜丘陵水行乎兩間旣固而旣寧及將近下流山遠而
地平渠裂爲二道河分爲九形雖暴不得怒雖盛不得盈
所以順而制歸之於滄溟後代蒙其業歷世六七十凡千
有餘年而無所決溢國君與世主豈皆盡有德蓋繇河未
徙一皆循禹迹河道旣一徙下涉乎戰國水行平地上迺
堤防湮塞其時兩堤間寔容五十里水旣有游息堤無所
毀後世迫而壞河設始煩從伐盡魏國薪下盡淇園竹
羣官皆負薪天子自臨篤其牲用白馬其璧用白玉歌辭
劇辛酸姑不至號哭瓠子口雖塞宣房宮雖築其後復北
決分爲屯氏河遂不復堤塞塞亦無如何兩河旣分流害

少而利多久之屯氏絕遂獨任一渠凡再決再塞用延世
之徒有天時人事可圖不可圖有幸與不幸數說不可誣
其後復大決大壞其田廬灌三十一縣言事者紛如將欲
塞之耶凡役百萬夫費累百巨萬亦未知何如如此是重
困是重民歎吁言事者不已亦不復塞諸李尋解光輩其
言不至迂遂任水所之渠道自割除當時募水工無一人
應書學雖有專攻術亦有窮歟諸所說河者桓譚實主之
但聚而爲書實無以處之班孟堅作志亦無所出取事有
甚難者雖知無所補今之爲河堤與漢無甚殊遠者無數
里近無百步餘兩堤束其勢如縛吞舟魚適足激其怒使
之逃囚拘又水性隱伏有容而必居浸淫而灌注日往而
月組埽材有腐敗土壤有浮虛水進而不止正如人病軀
病已在骨髓醫方治皮膚下不漏足脛上突爲背疽或水
如雷聲或埽如人喘或決如山傾或去如席卷如蛟龍引
陣如虎豹逃圈如地戶開闢如誰何生變如神物主之不
可得而辨嗟乎有如此堤防豈能禁蓋緣平地上失水之
本性而又無二渠分九河所任以九合爲一所以如此甚
今之爲邑居多在古堤內以諸埽準之高於屋數倍以水
面準之亦高數尺外諸埽正如城而土有輕脆民正如魚
籠處破湟呖澮被溺者常事不溺者幸大又河水重濁澱
淤日以積又夏秋霖雨諸水湊以入故有必決勢不決者
蓋鮮或決彼決此或決近決遠或決不可塞或塞而復決
或決於旦暮或決於歲月或新埽苟完或舊埽潰裂譬如
千萬鈞用一繩持挈必有時而敗必有處而絕而自決大

吳凡害幾郡縣河既北浸邊諸塘皆受患亡與逸馬孰
爲之隔限今雖甚盛時亦防不虞變所以議論者復故道
爲便故道雖已高可復亦可爲但恐既復後其變不可知
我兵學雖陋公兵學雖奇我說兵之難公亦莫我違河事
異於兵其難堪歔歔智有不可及力有不可施汲黯非不
偉所塞輒復隳王遵無奈何誓死而執圭若與唐衢說號
哭垂涕洟未說穿故道未說治故堤且說塞河口所費不
可推諸所謂發者秀積與山齊卷埽者如雲進埽者如飛
下埽名入川其誓憂流移上埽名爭高少動卽勢危萬人
梯急赴兩大鼓急作號聲號令用轉光指麾其救護危
急爭須臾毫釐又聞被灾郡數路方薦飢官私無畜聚民
力俱困疲朝廷謀已勞兩宮食不怡生民仰首望使者志
寢飢爲之奈何乎勿計速與遲事雖有堅定議論在所持
如一身所疾必以先後醫假如移所費用以業貧民償其
所亡失救其所苦辛或貸其田租或享其終身獨孤有常
餼使同室相親露屍與暴骸收斂歸諸墳精選強明吏處
之使平均鄉官與胥徒欺者以重論如此庶幾乎可無愁
怨人下酬更生望上慰再造仁然而論議者至今猶紛紛
或復其古道或因其自然公如決於一勿使衆議牽在已
者有義在命者以天而况行職分而况本誠忱聖朝無不
察知子之赤心嗟余何爲者草莽且賤微與公本無素一
見卽弗遺以伯兄處我以古人相期小設猶致說大事寧
無辭年且六十一未作溝中屍常恐公禮義如投諸污泥
豈欲爲迂濶不得已爲詩瀝吾之肝膽但恐同兒嬉又恐

誤公事公千萬慎思如將從近功卽廢圖便宜如必謀久
利唯古人是希是詢而是度是訪而是谷或博物君子或
宿儒老師或濱河野叟或市井年耆或愚直夫婦所言無
蔽欺或老胥退兵耳聞而目窺或世爲水學可與講是非
或博募水工按地形高卑從便道穿渠稍引河勢披海旣
爲大壑汴旣分一支如關竅疏通臟腑病可治此說如何
哉但恐出於狂如何完障塞如何復諸塘觀變而待時亦
恐謀不臧爲復有說者且須嚴邊防如魏尚守邊見稱於
馮唐如祭同久任使 伏藏以車制衝突如衛青武剛
多置強弩手如李廣大黃選募如馬隆練卒如高王如漢
置奔命使我軍勢張短兵斫馬脛衝車亂其行賞不以首
級所以嚴部分大陷刀如牆可以堅吾陣羊叔子以德郭
子儀以信光弼戰河陽揮旗令直進其時諸軍勢如決水
千仞楊素不用車可汗下馬拜僅以其身免號哭而大敗
將帥在方略勝却百萬兵安邊在良將勝却築長城願子
治水功有以酬明時便領鐵林兵盡衣犀牛皮連營環繡
帽大纛隨牙旗分金賜勇敢藏書付偏裨先聲義信遠下
令霜風馳出塞有豐草近關無馬蹄穹廬大漢外別部黑
山西代謀爲上策何用長纓羈本朝正明盛以德服外夷
使來不受獻南越回山梯西閉王門關東却高句麗四夷
無一事各安巢穴樓名將更無功優詔勒鼎彝師旋作鼓
吹軍容除虎貔銀鐙致郊勞翰林嚴鑠屏除書紙用麻省
吏身着緋公方有所念山足江之濬無心入黃閣有表辭
赤墀乞得老來身浩歌還會稽白雲與綠波無所不可之

春風桃花塢秋色黃菊籬茶籃與酒榼壺矢兼琴棋烹鷄
炊黍飴可倩麗公妻豈無會稽老雪夜同泛溪亦有二三
子棹歌相追隨散盡橐中金留得身上衣有宅是官借無
田可扶犁閑吟題寺觀長嘯入雲霓公得我詩後一夢須
先歸

李太白雜言

噫嘻欬奇哉自開闢以來不知幾千萬餘年至於開元間
忽生李詩仙是時五星中一星不在天不知何物爲形容
何物爲心胸何物爲五臟何物爲喉嚨開口動舌生雲風
當時大醉騎遊龍開口向天吞玉虹玉虹不死蟠胷中然
後吐出光焰萬丈凌虛空蓋自有詩人以來我未嘗見大
澤澗山雪霜冰霰晨霞夕霏萬化千變雷轟電掣花葩玉
潔青天白雲秋江曉月有如此之人有如此之詩屈生何
悴宋玉何悲賈生何戚相如何疲人生胡用自縲紲當須
犖犖不可羈乃知公是真英物萬疊秋山聳清骨當時杜
甫亦能詩恰如老驥追霜鶻戴烏紗着宮錦不是高歌卽
酣飲飲時獨對月明中醉來還抱清風寢嗟君逸氣何飄
飄枉教謫下青雲霄大抵人生有用有不用豈可戚戚反
效兒女曹採蟠桃於海上尋紫芝於山腰吞漢武之金莖
沆瀣吹弄玉之秦樓鳳簫

答李端叔

有人頗似長沙傅得官亦望長沙去去時好賦楚江謠蓬
使風騷滿江路便須酌酒弔三閭正是忠魂冤憤處縣令
如今未去時蘭亭故事猶可爲莫惜千筒萬筒往諸君方

壯我已疲登科學究文章豪數奇老將詩能高長沙縣令
號才吏方將睥睨謝與曹涼風卽是八九月紅萸黃菊花
將發正是詩家得意時莫學古人悲暮節東南美者有吳
姬紅襦繡袂無所施把酒一卮輕皓腕得詩一句勝娥眉
山夫野叟只如此諸君達者應相嗤有酒且慢飲有歌且
慢謳共君說懷抱未語先搔頭良久欲說說不得胸中有
物如山丘君不聞東家女子花見羞十六未嫁便悲憂墻
頭樓上到日晚馬驟車奔如水流西家亦有閨中女月壁
龍珠求未許有心自比蟠桃花無言竊笑陽臺雨謝鯤便
是妾家鄰敗唇折齒猶相語何況五陵輕俠兒拋金擲玉
教人非一夫奔處千夫馳不論榮辱與刺譏羶中之蟻醢
中鷄攫金逐獸兩眼迷主人下馬客已齊拜起俯仰容正
俾有如六月賣蒲葵唯恐不售霜風淒言至於此良可悲
所以慷慨見於詩誰能起舞誰能歌甕中有物如秋波古
來多少無奈何要須一醉都銷磨茫茫人間岐路多不如
海水通天河

俊老行送林次中赴都司

并序

客有張文潛與之夜坐論事良久及林公之義於是兩
人者名公爲俊老因公之去作俊老行送諸御者爲公
一笑也

熙寧察院一開口誰人膽落御史手其時面堅黑鬚力
欲回天氣衝斗一從蹭蹬作外官所居不苟心迹安剛不
可回堅不變頭如霜雪心如丹所以論者悅而服所養有
義其質端東西南北二十載一朝有勅却召還皂囊封上

曉班肅繡衣步入秋霜寒義有所徇乞得身白日降下天
上人黃金龍節青囊印赤帷熊乘朱斑輪以其餘才修職
分以其餘力娛精神望淮樓上對秋色玉女花前泣晚春
時時其帳過南郭來就陶潛漉酒中與人論事不必合直
無所苟氣色真持此以往無不可古人所以爲正臣淮南
一路事如草嘉苗惡莠俱分了中心皎皎如斯乎外討區
區何足道兩宮日月方齊明羣公戮力營太平公議急須
招俊老清風先已過南京

莫飲吳江水寄陳瑩中

莫飲吳江水胸中恐有波濤起莫食湘江魚令人冤憤成
悲呼湘江之竹可爲箭吳江之水好淬劍箭射讒夫心劍
斫讒夫面讒夫心雖破胸中膽猶大讒夫面雖破口中舌
猶在生能爲人患死能爲鬼害患兮害兮將奈何兩卮薄
酒一長歌灑向風煙付水波遣弔胥山共汨羅

瓊花歌

春皇自厭花多紅欲得花顏如玉容春皇青女淡相得先
教斂與秋霜色乃有雪月供光星榆獻白斟量銀漢琉璃
濕人間美玉搗作灰荆山崑山鬼神泣天上有人名玉女
投壺之外能爲素姑射神人解種花先須此物爲根芽天
罅地竅掬精粹蟾身驪額偷光華其時正是天地交二氣
上下陰陽調此花孕育得其正其間邪氣無纖毫所以其
色爲正色出乎其類拔乎萃一如君子有諸內粹然其色
見於外三月將盡四月前百花開盡春蕭然揚州日暖花
開未春香不動花房閉仙掌秋高玉露濃蛟人泣下珠璣

碎黃鸝本是花中客啼盡好聲求不得春皇費盡養花心
春風使盡開花力春歸鶯去花始開誰人放出深閨來唐
家天子太平時太真浴罷華清池紅裳繡袂厭君眼更作
地仙披羽衣麻姑睡起蓬萊島風吹玉面秋天曉洛川女
子能長生水生肌骨成瑤瓊褒姒不見諸侯兵盡日不笑
如無情宋玉移家安在哉東隣不畫燕脂腮卓文君去成
都速錦衣金翠慵裝束吹簫容貌果何如見說其人名弄
玉若比此花俱不足淫妖怪艷文之累一如婦人有賢德
不爲邪色辭正色孀居之女能自持終身唯着大練衣又
如正色立朝者不以柔媚爲奸欺以此論之乃可量人之
不正將胡爲論德乃是花之傑論色乃是花之絕洛陽花
名古云好看花須向揚州道君不見去年花下吹黑風霹
靂閃電搜玉龍此時半夜花光中不覺屈曲蟠長虹又不
聞天上琳琅樹種在烟霞最深處白雲枝葉白玉英此花
莫是琳琅精此花愛圓不愛缺一樹花開似明月襄王半
夜指爲雲謝女黃昏吟作雪杏花俗艷梨花粗柳花細碎
梅花疎桃花不正其容冶牡丹不謹其體舒如此之類無
足奇此花之外更有誰世非紅紫不入眼此花何用求人
知詩人自與花相期長告年年乞一枝

姚黃 并序

紫霄漫翁李道源見約分吟姚黃余畏其才不敢措筆
不得已而後塞命因爲之序曰天下牡丹九十餘種而
姚黃居第一其名雖千葉而實不可數或累計萬有餘
英不然不足高一尺也花肉旣重其梢下屈如一器欹

側之狀此亦花之巨美而精傑者乎是宜見於詩而不
可泯然使寂寂也

黃河南畔伊川北姚家宅是真花窟古來多少豪奢兒埋
却千鶯萬鶯骨中央精粹得之多西方秀氣來相和天與
明光常借日水宮暗脉正通河春風如酒半酣時誰教穀
雨報花期司馬坂前嬌半啓洛陽城內人俱知姚家門巷
車馬填牆頭墻下人差肩花上紅綃都蔽日花傍翠幕恰
如煙玉面兒來爭供帳錦袍郎去鬪拋錢無人不說姚花
好費却春功亦不少日長風暖綠梢低坐上金仙困將倒
鞠塵餅劑和香檀何以貯之承露繁爛錦脫來嫌太艷鮮
衣染就欲驟鸞君看此花肌肉豐一尺餘高千萬重粧面
淡藏青步障寶冠斜墮碧霞叢步搖好稱鳳凰玉環犀

佩珠鳴璫帝女何緣心好道阿嬌安用金爲房紺窠累棲
舒鴈雛沉烟噴出狡猊爐一種養成餘意態千花瘦盡春
肌膚峨峨一器欹且傾覆杯難辨鍾與觥染以蛟綃求正
色叩之玉挺希宮聲魏家紅共牛家碧迭霸花中聳高格
如今挽首甘下風九十種中爲第一此花莫似武昭儀出
得宮來不畫眉情貌欲爲狐媚態衣裳却是比丘尼楊妃
本是傾國身脫却紅襦號太真河水欲濡頭上髻馬嵬猶
着舊時裙物色一定猶可疑人心作變宜難知容易莫評
真與欺貌或如是心或非君不見老莊有深意萬物之中
最防僞

管春風

我是蓬萊山上客爲管春風歸不得今年更是春來遲江

南未寄梅花枝探春童子青霞衣時時去上青雲梯春風
消息苦不遠瑤臺瑤水冰霏淺蟠桃花在海東邊此花不
煩春一點東風日夜來人間到時先催草根軟大都紅紫
心先動小桃先覺枝頭重更有纖纖楊柳枝路傍先得行
人弄詩翁自愛蟠桃花鸞鶴不在無雲車城南夜半無酒
家和冰和雪春月華有客笑中攜劍去偷得銀瓶與肥豕
詩公兩眼看浮雲爲管春風不回顧

花下飲

我向桃花下立飲一杯酒杯酒先濡鬢花香隨入口花爲
酒家媪春作詩翁友此時酒量開酒量添一斗君看陌上
春令人笑拍手半青籬吟草半綠畦中韭閑鳥下牛背奔
豚穿狗竇潛身猶相雀引喙禽呼偶包麻隣乞火穿桑

餉糗物類雖各殊所樂亦同有誰知花下情猶能憶楊柳
中心卒無累外物任相揉余方寓之樂自號閑人叟

謝周裕之

樂不須絲竹花不須桃李舞不須輕軀歌不須皓齒人生
各有樂顧我如何爾我是兩柳翁家在南郭裏詩酒以爲
樂賓客至卽喜酒味酸或淡瓷碗粗而偉或無一創菜但
費幾張紙客所言用紙筆人情慕富貴公何眎賤鄙寒冷載肴酒
暮夜煩展履字誠非粹然飢餒亦勞止不用卞郎瓠但坐
杜侯椅兩卓合八尺一爐暖雙趾不以藥隨時而用繒掩
耳或啖魚菹盡或愛藏蔬美或取鱸與腊或約酒以指人
皆悅真厚誰敢停箸七一客癯而清偶坐爲六子吟聲尚
鼓吹懽情勝羅綺俗物無所用高會有如此

富貴篇答李令

我有一筒詩寫出千年意將令後世觀不是前言戲感君
再唱洞庭謠我亦重歌酬子惠古人達者嘗有異姓王一
門五侯三將軍弟兄同入中書堂對開大第連幾坊私門
列戟森鋒鉞十二簾捲珠熒煌雙姬扶起坐牙床綠鬟紅
袖花成行左盼右顧生春陽高車食客劔佩鏘堂上已滿
坐兩廊巨鑊大鼎烹牛羊玉壺挹酒金船長美人拜客求
盡觴歌姬一誤已絕肱纏頭彩幣堆如岡酬歌買笑金鴛
鴦奴袍火浣直兩箱三千廐馬紅錦障厠幃文繡爐薰香
更衣侍妾如閨房主人意氣秋鷹揚其心端如彩鳳凰一
言合意青雲翔須臾睚眦磨刀鎗門前鵬月可烘裳一日
失勢成冰隍小者腰領屍道旁大者連頸宗族亾犬鷄散
盡空遺墻野鳥入室山魃藏嗚呼哀哉可歎傷至死不悟
猶陸梁古來如此有多少豈似洞庭湖上老無租無稅一
生閑有飯有魚一杯飽日落波間烟正昏雲開湖口山光
曉棹翁適自巴陵迴掛帆直指瀟湘道有言不問俗窮通
何憂可入翁懷抱脩竿短棹已自足更有前村一茅屋賣
魚沽酒任醉醒繡戶朱門自歌哭嗟余未往心先慕更謝
棹翁詢去住風前月下誰知醉魄吟魂自來去堂前畫
作荆南圖夢中記得巴陵路

寄范椽

昨日沽酒典布襖今朝所典未可保最好綿衾剝典錢又
恐夜寒妻懊惱兩務酒官俱見怜沽我好酒如甘泉爲報
孟光莫惡發待將黃卷換青錢

贈張敏叔

張子生平最多難未老頭毛白一半頭雖更白詩更清正
作詩時人莫喚頭不肖轉身不移口中聲調霜風寒太清
宮殿月明時第一莫吹松竹詩

寄張文潛

不知今之人誰識張縣尉勿問胸中事但看面上氣所謂
人英者正是斯人輩前年南郭中文酒日夜會一從舍我
去忽忽再逾歲今茲歲且盡爲子吟不睡起坐却就枕伸
頭出紙被約是三四更老老抱雙脚此時吟正酣聲調不
可却春風起淮東須臾到嵩洛往往入子家但子眠不覺
子覺將奈何聲盡情思多上東門外路洛水生春波還我
大松來不用寄詩歌

送端叔二首 并序

夜漏將盡枕上再送端叔也洛水之陽馬上爲我誦此
詩卽此詩用木葉書投之水中便爲將來故事也延安
塞上見羣鴈能爲我誦此詩東南望否夜中枕上聞孤
鴈聲尤數數誦此詩也紙窮意未盡
端叔上馬去巷口馬頭轉我喚端叔時端叔急回面記取
此時意莫使落風埃上東門外水正望楚州來此水一來
不復見不及黃沙塞頭鴈
是物可寄情是物可寄聲不須使黃犬延州岐路遠莫怪
不登淮上樓只爲淮水不西流直待啣蘆鴈却廻其時隨
到天盡頭

送張宜父赴南從幕府 正彥

江南秋色芙蓉香滿江秋水傾銀潢泛水依花人姓張濤
翻浪湧揮文章突然出者何蒼蒼巨鼇爆背來中央鼃鼃
仰首仗四旁登臨談笑得庾郎安得霜鵝腰胯長騎上秋
空追鸕鷀北望海門形勢強美哉壯觀吳封疆若將前代
論興亡直談孫氏到陳梁凡爲佐命可哀傷其諸姦孽如
豺狼傾譏正直誣忠良以國販賣爲賈商歌姬舞女金滿
堂不須爲盜持刀鎗身雖幸免遺其殃子孫戮辱甚犬羊
所以不欲讀史書鼻漢目汗沾鬚潤州支使相如無山
陽老子如唐衢

贈陳留逸人

有人持一管不用蘆葉卷能作隴頭聲其女操六板吹者
寓其聲拍者會其情情聲與氣貌內外俱和平時時入酒
家便插幾枝花歸來無一事醉卧日西斜人或問所得答
云無憂嗟或問其所欲何物可相累我愛斯人者富貴所
不如如有如此娛樂作如何稱呼呼爲無憂人畫作無憂圖
更畫幾枝花酒瓢與酒壺

送呂清叔

慘慘黃昏天欲雪蕭蕭淮浦人聲絕風擊寒雲鴈正鳴客
眠孤棹燈將滅

和張文潛晚春四首

昨日枝頭紅鮮鮮染人指今朝尋不見已在汙泥底
麥穎未黃乾桑實半紅濕恰得一犁雨田事正火急
人事無如何多於道傍草但問酒有無莫管老不老
風暖鸞窠牢雲晴鳥翅健物生自有樂亦各適其願

示諸生

子莫爲文學纖麗須是渾渾有古氣本源要在養諸中不
然恐汝爲時輩

答何楚才

有客能操耒而捨其良田有客善攻玉而探珠於淵二者
之是非子以謂何如子乃捨所急若是其渠渠然余有二
說可爲不可爲所爲不可者子家無寒飢所謂可爲者奉
養之所資余此二說者子當慎擇之余嘗奇子貌亦嘗憐
子文不能爲子謀嗟哉空云云

還崔秀才唱和詩

元白有餘勢孟韓無困辭子美骨格老太白文采奇當時
大道久破碎人人文字萎茶而支離天生數子將卓卓鳴
鵲正成羣一鶚磨天飛嗟君不與數子共使君逸氣填塞
無所施我來雖無知黃金白玉看如泥自從詩卷一入手
掣然直上青雲梯十宵不睡亦不困厭賓日日關柴扉秋
風獵獵吹橫河蒼天萬里生銀波起來半夜吸一口睡魂
酒病都消磨

贈慎叔良

昨日故人來慰此白領叟兩叟忽相見面色如飲酒將此
酒色面抵却春風寒飲酒豈易比懽好良所難我已五十
八君已五十七人生勿草草兩公須努力

和李自明

自明多奇辭更爲奇怪歌好共盧仝騎綠耳吟哦直上崑
崙坡更令張旭輩醉中揮筆書嗟峨安用呼老子兩脚踏

素馳有命得堅疾無術除沉痾一從水木迭用事肺爲廢
物囚網羅而况小暑之後有初伏與大暑更添熱厲兼昏
魔骨間赫赤炭丸走皮上烘炙鐵手摩有時一屋之內但
覺湯火近不辨鑊與鍋手持匕箸腹先脹酒到喉隴顏已
醃青黏漆葉無所用身伸熊顧其奈何五臟孰云可滌洗
百骸終恐生蟲窠脫身難上赤霄路夢魂忽泛滄溟波滄
溟盡處是星漢有人常弄機與梭枯槎去後更無客歷歷
赤桂來經過取得良書掛牛角持將斗柄吞明河但把明
河吞滿腹不去龍田拾瑤玉便控鼈頭出海來霞點震痕
在眉目起穿兩柳行青莎怪歌使我須吟哦吟哦作文非
小事要爲法度後世無譏訶大抵文章本諸內歸之無憾
斯平和擬之於經輔之友精講明辨相切磋嗟君雖病肝其
心可用教我雖病肺心亦不自阿日夜思索已矣老矣所
學亡失多

和倪敦復

一別北軒君參商與胡越先聲從西來塵榻爲君拂吟行
時引頭吟坐卽搖筆未見問行人旣見惜短日緩頰相問
勞劇談盡忠切耳竅雖塞豆口角自流沫崔子祥而論祝
令閔且說籬間菊參差樽中酒澄澈把酒自相勸投菊兩
不絕客主莫分辨僮僕亦娛悅若比龐公家妻子不羅列
悔令唱驪歌惜不醉寒月念子爲令尹行義高突兀當官
志不回斂版腰可折與俗皆背馳而慕古遺烈竹節生便
堅劔氣久已發其時東野外頻頻大夫謁篇章日相尋氣
勢誰可遏仍攜大軸來使我兩目閱人事有合離歲月成

恍惚逸翮騰方高駿馬足不蹙子實不我忘我亦不子忽
與之氣類同見之心欲豁金城不可破鐵壁不可奪擇交
蓋已定言志亦已合布陣詩甚詳揮灑手不歇更約臨行
時斯言可贈別

答范君錫

報漫翁無錢可沽酒青衫典不得黃卷賣不售借問公田
中秫米種幾斗休管將來早與水莫爲妻兒種粳米兒來
留下二萬錢送與酒家主人未不然何計見春風空將花
插白頭翁簿書營營幾時了何如載酒訪楊雄

誰何哭

誰何哭哀且危白頭母朱顏兒兒忽捨母去母何用生爲
架上有兒書篋中有兒衣兒聲不復聞兒貌不復窺誰何
哭哀復哀腸未絕心先摧母恃兒爲命兒去不復來朝看
他人兒暮看他人子一日一夜間十生九復死君不見昨
夜人靜黃昏時含心抱痛無人知其時忽不記兒死倚門
引頸望兒歸

鴈從何處來

鴈從何處來正望東南飛毛間認白露肚下看殘暉浮雲
共煙水日夜爲所依衡陽是故山但恐故人稀

哭狗狗

東門園上春風微醇醇塚上花成圍醇醇一去不復返食
一盃酒一卮悲莫悲乎今日傷莫傷乎舊衣思其言而
想其貌吁嗟乎天喪吾兒

哀哀詞

哀哀復哀哀至此極孤兒與慈母中路忽相失恍惚
須臾間終日不復得誰復坐我堂誰復入我室誰復飲兒
酒誰復哺兒食兒飢復誰念兒寒復誰恤耳不聞慈語目
不見慈色譬如行路人口遠如一日行人猶可期遠道猶
可追天窮地盡處一日猶可歸哀復哀復哀此去無盡時
誰言生離別不如死別離君不見人已閉門鳥已棲黃昏
塚畔孤兒啼

送倪敦復

手持報簡人歸後足步迴廊角住聲但恐舟行隨早晚此
時秋色半陰晴明朝路向雲邊望今夜詩須枕上成四壁
無燈窗有月直無老夢到三更

寄張景修

東南未回客行樂又經年吳市花朝酒松江月夜船窮閭
無屋住廣殿有詩傳若論平生事無如任自然

和孫元規資政游園

紅作簾帷翠作裯隨軒歌舞一時新未知醒者何如醉且
向樽前莫負春煙重柳梢寒蘸水日高花徑暖生塵自從
三月芳菲後誤入桃源又幾人

謝蔡子驥

好客重來直上廳龐家妻女合炊秬名言一坐令誰聽老
病雙瞳爲子明有道長官方就祿無能司戶欲歸耕如斯
出處俱平易義理難時卽其評

夜賞春寄敦復

莫道山陽官辛苦大夫未是不閑人晝來琴上披尋曲夜

入花間點檢春拖袂帶歸香滿袖迴燈引去蝶隨身高才
自有風流格吟作吳語事最新

示汝弼

十載交情義有餘離群還歎索然居一番思我須成夢每
度人來定寄書此日相從尤歎密他時何處覓迂疎回來
徑哭青塋墓莫向南城問舊居

送至機

閉門有幸藏衰病策杖無因奉俊游繩纏筋骸方就枕火
燒皮骨正思秋覽君健句如逢藥慰我孤懷勝凭樓見說
束裝行未得夢魂先到楚江頭

寄路倅洪澤川水

莫教容易過龜山多少人心願復還更有南城黃綬客但

吟西戶綠楊間纔經濁汴無沉浪且趁清淮洗醉顏安得
就公歌一曲緩吟遲步夕陽灣

和路朝奉新居十五首

世俗紛紛事總虛詩翁今作逸人居勤穿東地緣栽竹喜
占明窗爲著書近市好賒春肆酒就淮仍買晚醫魚忽撐
小艇來西郭不問皆知訪仲車

詩翁愛酒典衣沽六子將孫侍燕居正要白家醇釀法不
須劉德僞金書厨經雪後炊無黍門近淮瀨食有魚何以
獻公尋物庾郎三韭載盈車

昔也聞名誦子虛今來白領隔城居新詩解道論頭句舊
客仍移把臂書北郭風高真隱豹南州循政喻烹魚歸時
見說臨川路父老爭留太守車

陳傅門前客姓徐有何智術佐間居接簷俛仰令遮雨縛
竹縱橫爲架書赴露斲田移草木和灣汲水貯龜魚上元
已過清明近更約尋花不用車

誰家住處近田廬朝奉抽簪就退居竹葉已成新歲酒梅
花未領故人書呼童解袂捫飢蝨趨日開箱曝蠹魚一似
散仙閑到夜卧屏仍看五雲車

坐想堂前弄白鬚蒲茵筍席正高居絲衣六子傍供饈錦
髻諸孫白教書愛士主人新置榻清身太守舊懸魚更吟
整斗論頭句勝却西庵詩一車

不辨時人直與迂濯纓且喜近淮居朝衣脫後常耽睡野
史脩時或借書恨乏青山俱採藥愛看白鳥伺吞魚東園
賣酒花開近待有詩翁倒載車

簿領脫來如一夢身名全後喜寧居生來自信無非義世
上何緣作謫書所養有源如大水其賢可樂比嘉魚願公
八十爲更老玉幣三徵乃就車

自是平時大隱徒何須水宿與山居都無長物垂空橐却
有閑房聚逸書近見雪消思野蕨遙呼船問憶江魚卸帆
便去尋村酒醉使兒孫推鹿車

身着練袍履用蒲鶡冠鳩杖稱郊居家中但乏青囊印坐
處便看黃卷書賃屋爲無楊子宅休官非爲武昌魚長年
不出何妨事况是門懸致仕車

夷白先生好對廬醉吟處士作鄰居幅巾自去呼樵父蠟
屐何時訪竹書坐想高談搖麈尾情知相誅跨鯨魚更憐
同姓陪樽酒勝却荀生得御車

路家巷口是何渠半似城中半野居已退白仙常按曲未
歸陸俊謾傳書雪消牆外逢挑菜日暖門前見捕魚更有
花間行處樂舊時歌舞願隨車
好養玄猿共鶴雛茆茨蓋屋竹間居家無越使千金索腹
有齊臣四部書一自臨川登畫鷁便煩別駕掌銅魚吟哦
還作詩仙退恰似驂鸞鳳駕車
世間詩淡鄭雲叟壽且安寧陶隱居愛酒自開浮蟻甕耽
詩如好換鵝書籜冠戴後搯筇竹鶴髦披來控鯉魚學作
蓬萊吟醉客何須駟馬駕安車
西庵翁上北城隅爲望臨川舊守居所恨足無雙翅鳥但
將詩代一函書甥教洗楹多沽酒妻使磨刀細切魚灑掃
待公來獻壽親扶杖履醉升車

和石宣德五柳亭

安正

五柳神君氣貌端所希所向靜而安每思往行投閑地宜
逐時情慕熱官林酒易醒風戶猛葛中難卧月窗寒也應
種得東籬菊好置藍輿自在觀

戲呈魏評事

三事

我向燈前置酒盃南軒北戶一時開如今正是花時節且
放春風數路來

寄蔡子驤

爲報廬陵客逢人且寄聲不知無恙否何日到南城

和張文潛晚春

易貯千尋水難藏一點春也須幾杯酒還似送行人
渡水衣須扱穿林手自披經春脚力軟但恐上山遲

二老寄朱廣微二首

二老相思又隔年，僧窗閑坐復何緣。吟翁最好鹽城住，時把歌詩付酒船。

寄聲切問朱監利，對面勤詢劉貴池。或見廣東程使者，爲言收得寄來詩。

吳舒信道

淮干風起木枝搖，頷下菟甌一尺高。我是折薪扶耒手中丞，且莫笑麓豪。

上林殿院次公九首

衰翁太半白髭鬚，活到明年六十餘。未死須爲沿河說，此生難就賑飢書。西庵共坐諸僧榻，南郭親逢大使車。記得偶同詩韻否，淮東使者亦嗟歎。

林氏家藏萬帙書，五船便可當五車。別顧客舟施坐榻，更謀官舫作行厨。寫時教子烘青竹，讀處呼童捉蠹魚。悔不早知都借取，終身挾策灌園蔬。

贈黃魯直

不見故人彌有情，一見故人心眼明。忘却問君船住處，夜來清夢繞西城。

華陽山和查教授

玉井溫溫浸月華，幢幢松檜聳高牙。半峰已斷人間路，絕頂自開天上花。可恨白雲吟處起，何堪行路望中賒。怪來得似希夷子，借問如今有幾家。

宿山館

煙蘿斷處初逢舍，雲竹疎時忽見燈。嶮磴未歸樵塢叟，破

庵已去誦經僧暗龍吟罷庭無月寒欬啼來谷有冰君看
牀頭鐵鱗甲雨痕苔暈幾千層
倦客待沽山下酒飢童先上竈頭燈行經怪穴思防虎坐
聽疎鐘欲訪僧手弄一張琴似鐵匣藏二尺劍如水調高
器古無人伴身上煙霞空幾層
龍歸潭面千尋黑虎視林隈兩炬燈龔爨正燃炊飯火乞
食恰值寄眠僧倦聽雨後諸巖溜渴憶春前一片冰卧看
滿山紅日曉碧瑤城闕鬱千層
厨頭火滅童偷飯梁上巢空鳥避燈入夜更無同舍客今
朝唯有放猿僧樵庵已貯霜前果竹院猶存臘後冰誰道
煙霄花上處一梯雲級萬餘層

送李守

莫說真州南畔路楚望亭南路已遙只可寄聲來見問更
難折簡去相招船頭何處逢秋水山下誰家把酒瓢且趁
潮行急搖艖到江州後更無潮癸亥六月十三日與朱至
機坐間得此到江後更無
潮一句其夕枕上成篇也

哭張六并序

張六子莊死矣十一月十三日夜四更時積用素服望
其所居哭之哭且爲詩明且涕泣以書使孤甥老老致
於柩前嗚呼哀哉

欲視目已瞑欲語口已噤欲動肉已寒欲書手已硬惟有
心上熱惟存心中悲此熱須臾間此悲無休時所悲孤兒
寒所悲孤兒飢苦苦復苦苦此悲遂入土

